

Bororokno Hamjaknaisa Kaitor



WBTC India

P.O. 8478
Bangalore 560084

The God Who Loved the People **(Kokborok Gospel of Mark)**

Easy-to-Read Version

Copyright © 2018 World Bible Translation Center-India

All rights reserved

Address

WBTC-India

18-19, 6th Street, 1st Block, Prakruthi Township

Babusapalya, Bangalore 560 043

Phone: 25603212, 25603461

Email: info@wbtcindia.com

Website: www.wbtcindia.com

Typeset By WBTC-India

Printed at Printpulz Enterprises, Bangalore

Mark

Johon Jisuni Lama Snamsoamani

1 ¹Kaitorni sajla ⁷Jisu Khristoni kothoma kaham cheng sama:
²Jisaia diyarini bijabo omo hai khe swijak tongo;

“Khna di! Ang ani kók tunnaisano nini slái swkang rohor
 anw.

Bo nini bagwi lama snam anw.”

Malaki 3:1

³ “Hasing panthoro khoroksa hai hwnwi chirikhokjak,
 ‘Norok Subraini bagwi lama snam di.

Bo himnani lamano kepleng khelai di.”

Jisaia 40:3

⁴Aboni bagwi baptisma rwnai Johon phaiwi sók phai kha, bo hasing panthoro bororokno baptisma rwui tong kha. Sumsok nakarjakna bagwi bwkha kiphilwi baptisma wng di hwnwi bebak bororokno bo sa kha. ⁵Hakhe Judia bai Jerusalemni bebak bororok bini thani tháng laina cheng lai kha. Bórok sak sakni sumsok gosi laiwi Jordon twima-o baptisma wng lai kha.

⁶Johon mangingang buikhumu bai takjak rí kano. Mui bukur bai bwchang khauí tonó tei kukthora bai bolongni piya modu chá-o.

⁷Bo hai hwnwi sa kha, “Ani slái ulo phainai, bo ani slái kwplai kuk, ang bomsonwi bini yaklap sokókna suda chúk ya. ⁸Ang le norokno twi bai se baptisma rw-o, phiya ba bo le norokno Phola kwthar bai se baptisma rwnai.”

⁷1.1: **Kaitorni Sajla** baksa Grik bijabo o kókhairok kwrwi.

Jisu Baptisma Wngmani

⁹Aphuru Jisu Galili amchoini Nasaretni phai kha, hakhe Johon bono Jordon twima-o baptisma rw kha. ¹⁰Twini kasa kheno nokha baknwi khe phiyokjakmani tei Phola Kwtharno pharuk hai khe bini saka-o birkhlaiwi phaimani abono bo nuk kha. ¹¹Hakhe chuknohani kók hai hwnwi sakhelaijak kha, “Nwng’-no ani khajani Sajla, Nono’-no ang belai khe khá phurjago.”

Jisu Belokjakmani

¹²Aboni logi-logino Phola Jisuno hasing panthoro tlangwi thángx kha. ¹³Bo aro nokha salbrwichi tong phuru-o Soitan bono belok kha. Bo aro bolongni uak-tokrok bai tongo, aphuru chuknohani suarirok bono chuba-o.

Galili-o Jisu Samung Tangna Chengmani

¹⁴Johon alongo chopjak bai khe Jisu Galili-o thángxwi Kaitorni aroni kothoma kahamno pírkha. ¹⁵Jisu hai hwnwi sa kha, “Jora sók phai laha; Kaitorni ha belai sampa kha. Norok sak-sakni tongdal tei bwkhano slái di, tei Kothoma kahamno poito khelai di.”

Jisu Sagri Khoroknwi Khorokthamrokno Chongmani

¹⁶Jisu Galili twibom rukung twí himwi tong phuru Simon bai Andriano twibomo chei soui á romwi tongma nuhur kha. ¹⁷Jisu bórokno hai hwnwi sa kha, “Norok ani logi phai di, ang norokno á romna ya, tamo khe Kaitorni bagwi borok romnani se phrwng anw.” ¹⁸Hakhe logi logi’-no Simon bai Andria bórokni cheino yakarwi Jisu bai thángx lai kha.

¹⁹Bo aboni ulo tei kisa bws kang Galili twibom rukungtwí himwi thángx phuru Sebedaini bwsarok Jakob bai Jhonno nuhur kha. Bórok rungo chei swamwi tong lai-o. ²⁰Jisu bórokno ring kha hakhe bórokbo bupha Sebedaino tei munirokno rungo klangwi Jisuni logi thángx lai kha.

Mwtai Hamya Kolobjakno Jisu Sra Rwmani

²¹Aboni ulo bórok Kapharnaumo thángx lai kha. Teini phungni chasalo, abono lenglama salbo hwnjago, bo thumnogo thángxwi bororokno phrwngna chengo. ²²Jisu phrwngmano khnanairok bebakno uanama chajak bai kha, tamoni hwnba bo kerong phrwngnairok phrwng twi phrwng ya, suar gwnang khe se phrwngo. ²³A thumnogo mwtai hamya kolobjak khoroksa achomsa hai hwnwi chirikhoksa kha, ²⁴“O Nasaretni Jisu, nwnghwng chwang baiba tamo nangjak? Nwnghwng chwangno sokomorna da phai lang? Nwnghwng sabo ang saui mano, nwnghwng Kaitorni aroni a borok kwthar.”

²⁵Phiya ba Jisu bono hai hwnwi damrok kha, “Siringcha wng di! O borokni bisingni ongkhorwi phai di!” ²⁶Hakhe logi logi'-no a mwtai hamya a borokno kwlwibrasarwui sotonwi chirikhogwi ongkhorwi phai kha.

²⁷Hakhe aswk bororok uanajak laiwi hai hwnwi sa lai kha, “Omo tamo wngma klai kha sla? Bo o phrwngmani abo kisaswk juda hai ya da? Bo suar gwnang khe phrwngo, tei mwtai hamyarokno suda dagi-o, bini dagimano bórok mabo ma khna-o.” ²⁸Hakhe Galili amchoi gwnangwi Jisuni kók pírxak kha.

Borok Kwbangmano Jisu Ham Rwmani

²⁹Aphuru Jisu tei bini sagrirok thumnokni uaisa baino Jakob bai Johonno logi tlangwi Simon bai Andriani nogo thángx lai kha. ³⁰Aro Simonni bwkrajwk belai khe lumwi thongaro klaijak. Bórok logi logi'-no Jisuno Simonni bwkrajwk lumwi tongma kókno sa lai kha. ³¹Hakhe Jisu bini thani thángxwi bono yak romwi socha khe logi logi'-no bini kulum sraui thángx kha, hakhe bo bórokno chá rw kha khan rw kha.

³²Sal habwi sanja wng kheno bororok Jisuni thani kwbangma sak hamyarok bai mwtai kolobjakrokno tubu lai kha. ³³Kamiyungni bebak bororok a nok duglam bwskango kuthum lai phai kha. ³⁴Bo podrepod bemuk gwnang aswkni hamyarokno

ham rw kha tei mwtaí hamyaroknobo rwkhlai kha. Phiyaba bo mwtaí hamyarokno mungsa sana rw li ya, tamoni hwn khe bórok bono sini-o.

Jisu Kubun Kamiyungo Thángmani

³⁵Teini phungo katswi pile-pala-o sal pa ya sini Jisu nokni onghorwi siring siring kwrwngsa-o thánghi saichung suriui kha. ³⁶Simon bai Jisuni logi-o tongnairok bono naitukna bagwi thánghi lai kha. ³⁷Bórok bono malai kheno, “Jotono nono naitugwi tong lai kha,” hwnwi sa lai kha.

³⁸Hakhe Jisu bórokno hai hwnwi sa kha, “Phai di kubun kamiyungo thánghi lai anw, hakhe arobo ang pírwí man anw; aboni bagwi se ang phaimaba. ³⁹Hakhe bo Galili gwnangwi thumnokrogo pírwí kha, tei mwtaí hamyarokno rwkhlai kha.

Biyadi Chájak Khoroksano Jisu Ham Rwmani

⁴⁰Salsa biyadi chajak khoroksa yáskú súngwi hai hwnwi koi phai kha. Bo Jisuno hai hwnwi sa kha, “Nwng muchung khe ano ham rwui mano.”

⁴¹Jisu bini páithakni kókthaino khnathokjak li ya,² phiyaba bono khairokjagwi yak phologwi tangwi hai hwnwi sa kha, “Ham di, angbo ahaino nai-o.” ⁴²Logi logi'-no a borokni biyadi kwmaui thánghi kha, hakhe bo ham kha.

⁴³Aphuruno Jisu bono yakarwi rohor kha. ⁴⁴Bo bono kwra khe ragdama khlaiwi hai hwnwi sa kha, “Ang nono tamo khlai kha, o kókno khoroksano phano ta sa di, phiyaba ochaini aro thánghi nini sakno phunugwi di tei biyadi bemukni hamma bagwi Musi dagima twino Kaitorno hili rwui di, abo bai nwng

²**1.41:Khnathokjak li ya** Kwbangkuk Grik bijabono “khairokma bai” hwnwi swijak ... Phiya baksa kaham Grik bijab bai Latin bwtangrogo khe khnathokjak li ya hwnwi swijak tongo. Abono saui buchi rwnani belai kutuk. Hai phano kwbang kuk elem kwrwngrokno “khathokjak li ya” o kókno'-no sói hwnwi gosi lai kha.

hamsuk kha hwnwi bororok saui man bai anw.”⁴⁵Yang khe bo hammani kókno phataro thángxwi yang ayang aswk khe pírkha, Jisu nukjagwi kamiyungo habwi se man li ya. Aboni bagwi kamiyungni phataro siring siring kwrwngsa-o bo tongwi kha, hakhe babaibrwini bororok bini thani phai lai kha.

Yakung Yakmanyano Jisu Ham Rwmani

2¹Salnwi salthamni ulo Jisu Kapharnaumo kiphilwi phai kha. Hakhe bo nogo tongo hwnwi babaibrwi bwkhakno kók pírkha. ²Hakhe aswk borok kwbangma aro kuthum phai lai kha siping kolsa berana phano jaga kwrwi kha, duglamni phataro suda kwrwi kha. Bo bórokno Kaitorni kók pírkha. ³Aphuruno borok khorokbrwi uáyingo khe yakung yak man ya khoroksano bini thani balwi tubui phai lai-o. ⁴Phiya a yakung yak man yano bórok Jisuni thani tlangwi se man li ya. Hakhe Jisu tongma dikholo núkhung swplau a yakung yak man yano uáyingo mokholjak khe tikhlai rohor kha. ⁵Bórok aswk poito khlainano nugwi Jisu a yakung yak man yano, “Chwlasa, nini bebak sumsok nakarjak kha” hwnwi sa kha.

⁶Aro achugwi tong lainai kerong phrwngnai khoroknwi khoroktham bwkha bising bising hai hwnwi uansuk lai kha, ⁷“Bo bahai khe o kókno sarak? Omoba Kaitorno hamya sama se bla: Kaitorno karwi khoroksa phano sumsokno nakarwi mannai sabo tong?”

⁸Jisu bini pholani bising twí a kerong phrwngnairok uansugwi tongmano aphuruno saui manwí, “Tamo wngwi norok omo hai uansuk lai?” hwnwi bórokno swng kha. ⁹⁻¹⁰Bú kók sana lai kuk, “‘Nini sumsok nakarjak kha’ ya kheba, ‘bacha di’, nini uáying khochaui himwi thángx si di, hwnwi sana da lai kuk?” Phiyaba o hayungo Borokni Sajla sumsok nakarwi mano abono ang norokno phunuk anw. Hakhe bo a yakung yak man yano hai hwnwi sa kha, ¹¹“Ang nono sa-o, bacha di, nini uáying khochaui nogo thángx di.”

¹²Bo bacha kha tei logi logi'-no bini uáying khochaui jotoni bws kang t'wi himwi thá ng kha. Abo bai jotono uanajagwi Kaitorno lobwi, "Omo t'wirok le omoni slái swkang uaisa phano nuktrwng ya kho" hwnwi sa lai kha.

Lebi Jisuno Rwktharmani

¹³Aboni ulo bo haino hai twibom rukungo kiphilwi thá ng khe borok kwbangma bini thani phai lai kha, hakhe bo bórokno phrwng kha. ¹⁴Ulo himwi tong phuru bo Alphaini bwsla Lebi hwnwi teks romnai khoroksano bini tangnogo achukjak nuhur kha. Bo bono, "Ani logi phai di" hwnwi sa kha. Abo khna kheno Lebi bacha kha tei Jisuni logi-o thá ng kha.

¹⁵Ulo bo Lebini nogo kasau mai chá ui kha, tei kwbangma teks romnairok bai basijakrok Jisu tei bini sagrirok bai baksa chá na achuk lai kha. (Bórokni bisingo kwbangmano Jisuni logi thá ngnairok má ng se). ¹⁶Kerong phrwngnairokni bere khoroknwi khoroktham Pharisairok Jisuno teks romnairok tei basijakrok bai chá laima nugwi bini sagrirokno hai hwnwi swng kha, "Tamo wngwi Jisu teks romnairok tei basijakrok bai baksa thansa khe chá?"

¹⁷Bórok samano khnau Jisu hai hwnwi sa kha, "Kaham borokni bagwi daktor nang ya, hamya borokni bagwi se nango. Borok kahamrokno ang ringna phai ya, sumsok gwnangrokno se ringna phai-o."

Jisu Kubun Tongtharni Twíphangrok Hai Ya

¹⁸Aphuru o Johonni sagrirok bai Pharisairok ok bukcha tong lai-o. Aboni bagwi baksa borok Jisuni thani phaiwi bono hai hwnwi swng lai kha, "Johonni sagrirok bai Pharisairok ok bukcha tong lai-o; phiyaba nini sagrirok hwn khe tamo wngwi ok bukcha tong lai ya sla?"

¹⁹Jisu bórokno hai hwnwi sa kha, "Káijaknaisa tong twt'wi kailaibari panda-o phainairok ok bukcha khe tongna nango hai

da? Káijaknaisa tongsak bórok ok bukcha tong glak. ²⁰Tamo khe omo t́wi sal phai anw, káijaknaisa bórok bai swkagwi tlangjak anw, a salo bórok ok bukcha khilai ma tong anw.

²¹“Rí kwchamo khoroksa phano rí kwtał thap ya; thap khe a rí kwtał kwchamno kichik rwui kákhilai rwnai, hakhe kwpla teibo uarnai.” ²²Khoroksa phano angur bwtwi kwtałno twk mosonjago ton ya, ton khe a twk rechek rachak wngwi thángxnai, hakhe angur bwtwi bai twk mungnwnwi’-no hamya wngwi thángxnai. Angur bwtwi kwtałni bagwi twk kwtałno nango.

Sabat Salnibo Bugra Wng Kha Jisu

²³Salsa Sabat salo Jisu bai bini sagrirok mai bising bising himwi thángx laimani. Sagrirok him lai twt́wi maitángx cherwi chá laina cheng kha. ²⁴Pharisairok Jisuno hai hwnwi sa kha, “Tamoni bagwi nini sagrirok omo hairók khilaiwi chá lai? Sabat salo omo hai khilai laimani chini kerongni raidano swbaima klai-o.”

²⁵Jisu hai hwnwi sa kha, “Daud bai bini bororok ok khui-ui chámung nangwi tong phuru tamo khilai kha, norok pori ya kho di ba? ²⁶Abiathar ochai bokhorokni jora-o se omorok wngo. Daud Kaitorni nogo habwi Kaitorno yapharmani rutino cháui kha. Musini kerongo hwn khe ochairok simi se a rutino cháui mano. Daud bini palsongroknobo a rutino rw kha.”

²⁷Hakhe, Jisu Pharisairokno hai hwnwi sa kha, “Bororokno chubana bagwi se Sabat sal khilaijago. Sabat sal bai bororok t́widuljakna bagwi ya.” ²⁸Aboni bagwino Borokni Sajla Sabat salni simi ya bebak salni’-no Bugra.

Sabat Salo Khoroksa Hamya Khoroksano Jisu Ham Rwmani

3 ¹Tei uaisa Jisu thumnogo thángx kha. Aro-o yak kompa khoroksa tongo. ²Judairok bere baksa Jisuno kaham khe naichom laiwi tong lai-o. Sabat salo a bororokno bo hada ham rw, abono bórok naichom laiwi tong lai-o. Bórok naimani hwn khe Jisu mungsaswk samung chaya khilai thung hakhe bórok

bono majra ber laiwi mano. ³Jisu a yak kompano hai hwnwi sa kha, “Jotono nukna t́wi khe oro bacha di.”

⁴Hakhe Jisu a bororokno hai hwnwi śwng kha, “Sabat salo bú samung khilai kha hwn khe sói wngma klai: Kaham khlaima da eba hamya khlaimani? Khoroksani langma mwthangmani da sói eba butharmani?” Hakhe a bororok mungsa pung lai li ya.

⁵Jisu a bororokno naisik kha. Bórok belai bwkha kwrakni bagwi bo jobo jolijak kha tei khá hamyabo wngjak kha. Bo a borokno hai hwnwi sa kha, “Nini yak pholok di.” A borok bini yak pholok kha hakhe bini yak hamwi th́ang kha. ⁶Hakhe Pharisairok ongkhorwi th́ang bai kha tei Herodni bororok bai Jisuno bahai khe buthar lainai hwnwi kók chap lai kha.

Borok Kwbangma Jisuno Rwkthar Iaimani

⁷Jisu bini sagrirok bai twibomo th́ang lai kha. Galilini borok kwbangma bórokno rwkthar lai kha. ⁸Judia, Jerusalem, Idumia, Jordon twima ayang narni tei Tur bai Sidonni kwbangma bororok aro-o phai lai kha. Jisu aswk samung tangwi tongmano khnau se o bororok aro phai lai-o.

⁹Aro borok kwbangmano nugwi Jisu bini sagrirokno bini bagwi rung khungsa naharwi tiyar khilai di hwnwi sa kha. Bo rung nangjakmani hwn khe borok kwbangma bini saka klai phai ya wngna bagwi se. ¹⁰Bórokni bisingni bororok kwbangmano'-no bo ham rw kha, hakhe joto hamyarok bono tangna bagwi bini bwkhak dagarwi tong lai kha. ¹¹Baksa borok hwn khe mwtaí hamya bai kolobjak; mwtaí hamyarok Jisuno nuk khe, bórok bini bws kango klaiwi “Nwng'-no Kaitorni Sajla!” hwnwi chirikhok kha. ¹²Phiyaba a mwtaí hamyarokno bo sabo ta sa di hwnwi Jisu ragdama khe sa kha.

Jisu Bini Chonghor Chiknwirokno Chongmani

¹³Jisu ulo hathai saka-o kasau th́ang kha tei bo naima bororokno bo bai baksa phai di hwnwi ringhor kha. Hakhe bórok bini

aro thángx kha. ¹⁴Tei bo khorokchiknwi borokno chong kha tei bo bórokno chonghor hwnwi mung rw kha. Bo o khorok chiknwirokno bo bai baksa tongnani tei Kaitorni kók píρθhani rohorna bagwi chong kha. ¹⁵Bo bórokno bororokni aroni mwtaí hamyarokno rwkhlainani phan man thung hwnwi muchungjago. ¹⁶Omorok wng kha Jisu chongmani a khorokchiknwi bororokni mung:

Simon (Jisu bono Pitor hwnwi mung phar kha):

¹⁷ Sebedaini sajasong Jakob bai Johon (Jisu bórokno Boanergi hwnwi mung phar kha, abo bórok phirangni sajla hwnmani se):

¹⁸ Andria, Philip,
Bartholomai,
Mathai,
Thoma
Alphaini sajla Jakob,
Thadai,
Simon ha hamjaknaisa,

¹⁹ Judas Iskariot (Jisuno kena arirokni yago romwi rohornai).

Jisuni Phan Kaitorni Aroni Se

²⁰Jisu nogo kiphilwi thángx khe borok kwbangma aro kuthum lai phai phi kha. Borok bángma bagwi Jisu bai bini sagrirok mai suda ma chá lai li ya. ²¹Bini nokni bororok abono khnauí bono náharna hwnwi thángx lai kha, tamoni hwnma le bororok bono kobor kha kha hwnwi sa lai tong lai kha.

²²Jerusalemni phainai kerong phrwngnairok hai hwnwi sa lai kha, “Soitan bini bisingo tongo! Mwtai hamya bokhorokni phan bai se bo bororokni aroni mwtaí hamyarokno rwkhlai-o.”

²³Hakhe Jisu bórok bebakno baksa khe ringwi rwngthoma bai khe bórokno hai hwnwi sa kha, “Soitan bo bini mwtaí hamyarokno bororokni aroni rwkhlai ya. ²⁴Ha kaisani borok bai

borok se bulai-toklai wng lai tong khe a ha báíwi thángxnai, ²⁵Tei núkhung khungsani borok se kak lai phui lai wngjak hwn khe a núkhung báíwi thángxnai. ²⁶Tumung Soitan se tabuk bini bwkhak ya hwn khe tei bini bororok bai bo se nang laiwi tongo hwn khe, bo'-bo kwmaui thángxnai, arono Soitanni kwmmamung wngnai.

²⁷Khoroksa swk phan gwnang borokni nogo habwi bini manwirok khoknani muchung khe bono swkang baira ma khanai. Hakhe bórok bini nokni manwi khwnwirokno khogwi tubui mannai.

²⁸“Ang norokno sóino kubui kók sa-o, bororok bebak sumsok khclaimani abo nakarjagwi mano, tei bórok Kaitorno aswk hamya samarokbo nakarjakna phano tongo, ²⁹tamo khe Phola Kwtharno hamya sanai borok le nakarjak glak. Bórok a sumsokni majra twí phlai mángx ma thángxnai.

³⁰Jisu o kók ma samani hwn khe kerong phrwngnairok bono mwtaí hamya kolobjak hwnwi samani bagwi se.

Jisuni Sagrirokno Wng kha Bini Núkhungni Kubui Bororok

³¹Aphuru Jisuni buma bai bini thakhuksong phaiwi sók phai lai kha. Bórok phataro bachauí tong lai kha, tei bono phataro phai gra di hwnwi sana bagwi bisingo borok rohor kha. ³²Borok kwbangma Jisuno kitingwi achuk laíjak. Bórok bono “Nwma, nini takhuksong tei nini bukhuksong phataro nono naising laíjak” hwnwi sa kha.

³³Jisu bórokno hai hwnwi swng kha, “Sabo ani ama? Sabo ani takhuksong? ³⁴Hakhe bono kitingwi achugwi tongnairokni bwkhak naisigwi bo hai hwnwi sa kha, “O bororok’-no wng kha ani ama tei ani takhuksong! ³⁵Kaitorni muchung twí tongnairok se ani kubui takhuk tei ama.

Maichwlwi Sarmani Rwngthoma

4 Jisu haino hai twibom rukungo phrwngna cheng kha tei borok kwbangma bono kitingwi kuthum lai kha. Bo achugwi

twibomni simi phrwngwi manna t'wi khe rungo kasa kha. Yang bebak bororok hwn khe twibom rukungo tong lai kha. ²Bórokno podrepod phrwngna bagwi Jisu rwngthomarok sa kha. Bini phrwngmarokni bere kaisa phrwngmung o rwngthoma-o tongo:

³“Khna di! Borok khoroksa maichwlwi sarna hwnwi thángx kha. ⁴Bo maichwlwi sar phuru baksa maichwlwi lama-o klai kha. Toksarok phaiwi bebak maichwllwino cháui pái kha. ⁵Baksa maichwlwi hwn khe holong kupulung ha-o klai kha. Ha bángthayani bagwi maichwlwi daktino bumuk per kha. ⁶Ulo sal kasau phai kha tei buphangrok khamproui thángx bai kha. Yarwngrok kuthuk thángxwi manyani bagwi buphangrok thwiwi thángx bai kha. ⁷Baksa maichwlwi busulwngo klai kha. Busulwng torsau buphangrokno tor rwui man ya khlai kha. Hakhe buphangrok bwthai tháíwi man li ya. ⁸Baksa maichwlwi hwn khe ha kahamo klai kha. Aro bórok tor kha tei bwthairokbo tháí kha. Baksa hwn khe kwthamchi, baksa dokchi tei baksa ba sara tháí kha.

⁹Hakhe Jisu hai hwnwi sa kha, “Khunju gwnangrok hwn kheba o kókno khna thung!”

Tamoni Bagwi Jisu Rwnghthoma bai Phrwng

¹⁰Aboni ulo, Jisu bororok bai kak lai khe, chonghor khorok chinwirok bai bono kubun rwktharnairok rwngthomano swbaiwi sa di hwnwi bono sa lai kha.

¹¹Jisu hai hwnwi sa kha, “Kaitorni hani huijak kók kubui norokno si rwjago phiya buino hwn khe ang rwngthoma bai se bebak sa si-o.

¹²Ang omorokno samani hwn khe

‘Bórok nai mángx tong anw hai phano nuk glak;

Bórok khna mángx tong anw hai phano romwi man glak:

Tumung nugwi bórok romwi man khe,

bórok sláijagwi tei nakarjak kha mun’.”

Jisaia 6:9-10

Jisu Maichwlwi Sarmani Rwnghthomano Swbaiwi Samani

¹³Hakhe Jisu bini sagrirokno hai hwnwi sa kha, “Norok o rwnghthomano romwi da man kha?” Norok romwi man ya hwn khe tei rwnghthomarokno bahai khe romwi mannai? ¹⁴A sarnaisa hwn khe Kaitorni phrwngmungno bororokni thani sarnai hai se. ¹⁵Uáisa-uisu a phrwnigma lama-o klai-o. Abo hwn khe Kaitorni phrwnghthomano khwnanai baksa bororok hai. Bórok abono khnama logi logi’-no soitan phaiwi bórokni bisingo sarjak a phrwnghthomano tlangwi thángo.

¹⁶“Baksa borok hwn khe holongsiki kupulung ha-o maichwlwi sarjak hai. Bórok a phrwnghthomano khna-o tei datino khapang srangwi khá-o chobwi na-o. ¹⁷Hai phano bórok abono bórokni khá-o kuthuk khe tlangwi man ya. Srapsani bagwi se bórok abono tono. Hakhe sátok tekto phai keno bórok a phrwnghthomano yachakmano yakarwi rw-o.

¹⁸Baksa borok hwn khe busulwngo sarjak maichwlwi hai. Bórok phrwnghthomano khna-o, ¹⁹tamo khe bórokni langmarok podrepod bai kupulung wngo: langmano tówiwi uana-o, rang-ríno hamjago, bórok naimani bebak manwino’-no mannani muchungjago. Omorok bai o phrwnghthomano kasujagwi torwi logwi man ya wngo tei bórokni langma-o bwthai tháwi man ya wngo.

²⁰“Tei baksa hwn khe, ha kahamo sarjak maichwlwi hai. Bórok a phrwnghthomano khna-o tei yachagwi na-o hakhe bórok torologo tei bwthairok thái-o, hakhe baksaba kwthamchi, baksaba dokchi tei baksa hwn khe sara.”

Norok Simano Samungo Thepa Di

²¹Hakhe Jisu bórokno hai hwnwi sa kha, “Norok khoroksa phano chati nau thopna tola-o eba chuki tola-o toda ton? Khoroksa phano ton ya. Norok abono thopna saka’-ono tonnai. ²²Bebak huijak tongmarok tikhlaiwi phunukjak anw. Bebak bisingni manwirokno kariui sini rwjak anw. ²³Norok khunju tong khe o kókno khna di! ²⁴Norok khnau tongmarokno bwkha rwui

uansuk di. Nono bwswk rwna nang abo nwnng bwswk buchi kha bo bai se su-ui rwjaknai abono Kaitor saui mano. Nini manthaini slái kwbang se bo nono rwnai. ²⁵Kwbang buchinairek bórok kwbangno mannai. Phiya kisa buchinairek hwn khe a kisa buchimarok suda kwmaui thángxaknai.”

Jisu Bwchwlwini Rwnghoma Samani

²⁶Hakhe Jisu hai hwnwi sa kha, “Kaitorni ha wng kha borok khoroksa bini kheto-o maichwlwi sarma hai se. ²⁷A bwchwlwi bumuk pérna chengo. A borok thu-ui da tong sichau da tong abo bini thani mungsa buya, a bwchwlwi hor-sal torwi’-no tongo. Abórok bahai khe wng kha bo mungsa saui man ya. ²⁸A ha chubachu nayau ahaino bwthai thái rw-o. Swkang bumuk, ulo bosok, aboni ulo sói maitáng. ²⁹Mai mun kheno a borok abono ra-o tamoni hwnma le ranani jora wng kha.

Kaitorni Ha Abo Bahai

³⁰Hakhe Jisu hai hwnwi sa kha, “Kaitorni ha bubo hai abo ang bahai khe nono abono phunuknai? Bubo hai rwnghoma bai abono ang swbaiwi sanai? ³¹Kaitorni ha wng kha norok o ha saka káimani jotoni slái kotoikuk horua bwchwlwi hai se. ³²Phiya abono norok kai khe torwi logwi norokni barini jotoni kotorkuk buphang wngo. Bini bedek bupra kotor kotor wngo. Toksarok phaiwi aro bothoprok thum phai bai-o tei saklom rw-o.”

³³Jisu borokno phrwngna bagwi omo hairók kwbangma rwnghomarok sa kha. Bórok buchiui manma jora twino bo bórokno phrwng kha. ³⁴Bo omo hai khilai mángno bórokno phrwngo. Phiya Jisu bini sagrirok bai simi phuru hwn khe bo bórokno bebakno swbaiwi sa bai-o.

Jisuni Sagrirok Bini Phanno Nukmani

³⁵A salni sarigo, Jisu bini sagrirokno hai hwnwi sa kha, “Twibom ayang naro ang bai baksa phai di.” ³⁶Hakhe bórok aswk

bororokno yakarwi klangwi Jisu swkangno tongmani a rungo tháng lai kha. Bórok bai baksa tei kubun rungrokbo tháng kha. ³⁷Twibomo nokbar kotor belai khe sibcha kha. Twi aphalrok rung gana-o nang phaiwi tei bisingrogo hap phaiwi rungo twi pung twtwí khelaiwi ton kha. ³⁸Jisu hwn khe kobongo khorok beraui rung bisingo se thu-ui tongo. Sagrirok thángwi bono sochau hai hwnwi sa kha, "Hodakra, Nwng kisa phano uana ya da? Chwng le twi-o kwlwgwi se thángxanai tong kha!"

³⁹Jisu bachau nokbar bai twino damrogwi hai hwnwi sa kha, "Siringcha wng di! Kwchang kwchang wng di!" Hakhe nokbar ma thak kha tei twibomni twibo kwchang kwchang wng kha.

⁴⁰Bo bini sagrirokno hai hwnwi sa kha, "Norok tamoni aswk kirijak bai?" Tamoni aswk poito kwrwi wng bai?

⁴¹Bórok belaino kirima habwi hai hwnwi sa lai kha, "O borok sabo? Nokbar bai twi suda bini kók khnau ma tongo?"

Mwtai Hamyarokni Yakni Borok Khoroksano Phiyókmani

5 ¹Jisu tei bini sagrirok twibom ayang narni Gerasarok tongma amchoi-o tháng kha. ²Jisu rungni ongkhor kha hwn khe, borok kwthwi phobma hakhorongnai borok khoroksa bini thani phai kha. O borok mwtai hamya bai kolobjak. ³Bo simalwngo tongo. Khoroksa phano bono khau tonwi man ya, sorni dwkhwirok bai suda khau narwgwi man ya. ⁴Bororok bono sorni dwkhwi bai máng yakung yak khau ma tono. Hai phano bo a sorni dwkhwirokno suda sachuui pái-o. Khoroksa phano bono kók khna rwui man ya. ⁵Sal bai hor bai bo simalwng hakhorrok bai hathairogo máng'-no tongo. Bo chirikhok trwngo tei holongrok bai sakrokno ra-o.

⁶Jisu hakchalo tong phuruno a borok bono nuhur kha. Bo Jisuni thani khachigwi bini bws kango klaiwi khulum kha. ⁷⁻⁸"O mwtai hamya, o borokni bisingni ongkhorwi phai di," hwnwi Jisu saui tong phuru a borok sotonwi chirikhogwi hai hwnwi sa kha, "O Jisu, Kaitor kotorni sajla nwng ano tamo khlaina nai? Ang Kaitorni mung bai nono koiwi saja-o, ano ta sátok ja di!"

⁹Hakhe Jisu a borokno, “Nini mung tamo?” hwnwi s'wng kha.

A borok hai hwnwi sa kha, “Ani mung khe Kwbangma, tamoni hwnma le ani bisingo kwbangma mwtaí hamya tongo. ¹⁰A borokni bisingni mwtaí hamyarok bórokno aroni ta rohor ja di hwnwi Jisuno koiwi máng tong kha.

¹¹Aboni gana hathai saka-o kwbangma uakrok ada chá laiwi tongmani. ¹²A mwtaí hamyarok Jisuno hai hwnwi koiwi sa kha, “Chwngno u uakrokni thani rohor di. Chwng bórokni bisingo habwi th'áng anw.” ¹³Hakhe Jisu bórokno abo hai khilai rwnani gosi kha. Mwtai hamyarok a borokno yakarwi uakrokni bisingo habwi th'áng lai kha. Hakhe aswk uak kwbangma hathaini khachigwi nongkhor khilaiwi twibomo klai phai kha. A uakrok bebakno twi-o kwlwk bai kha. Aro bebagwi mak 2000 swk uak tongo.

¹⁴A uakrokno mwrwngwi tongnairok bebakno khárwi th'áng bai kha. Bórok kamiyungo khachigwi th'ángwi bebak bororokno o wngmarokno saui kha. Hakhe bororok abono naina th'áng lai kha. ¹⁵Bórok Jisuni thani phai lai kha tei a mwtaí hamyarok bai kolobjak borokno rí-chum kanwi kaham kwrwng khe bini gana achukjak nugwi belai kirijak lai kha. ¹⁶Jisu khilaimano nuknairok, mwtaí hamya kolobjak borok wngmarokno nuknairok, uakni aro wngmano nuknairok, abórok bebakno bórok buino saui bai kha. ¹⁷Hakhe a bororok Jisuno bórokni amchoi yakarwi th'áng di hwnwi koi lai kha.

¹⁸Jisu a amchoi yakarwi phaina bagwi rungo tiyar wngwi tong phuru mwtaí hamya kolobjakni phiyójkaknai borok bo bai baksa th'ángna hwnwi koi phai kha. ¹⁹Phiya ba Jisu bono tlangnani soi li ya. Bo hai hwnwi sa kha, “Nogo tei nini kichingsongni aro th'áng di. Subrai nini bagwi aswk khilaimano bórok bebakno sa bai di. Subrai nini bagwi bwswk kaham khilai kha bórokno sa bai di.”

²⁰Hakhe a borok lam rw lang kha tei Jisu bini bagwi tamo samung kotor khilai kha kamiyung khungchini bororokno th'ángwi saui kha. Abono khnanairok jotono uanajak bai kha.

**Jisu Bwrwi Khoroksano Mwthangmani Tei
Bwrwima Hamya Khoroksano Ham Rwmani**

²¹Jisu twibom ayang narni rung bai khe kiphilwi phai kha. Twibom rukungo bororok kwbangma bono kuthum lai kha. ²²Jair hwnwi thumnokni khoroksa t́wiphang phai kha. Bo Jisuno nuk khe yáskú sungwi bono khulum kha. ²³Bo Jisuno koiwi hai hwnwi sa máng tong kha, “Ani bwrwima thwina nai tong kha. Nwng phaiwi bini saka-o kisa yak bera phai ja di. Hakhe bo ham anw tei kaham kwrwng khe tongwi man anw.”

²⁴Hakhe Jisu Jair bai baksa tháng kha. Kwbangma bororokno Jisuno rwktharwi tháng lai kha. Bórok kese-rebe khe bini gana-o nang t́wi nang t́wi khe dagarwi tong lai kha.

²⁵A bororokni bisingo nokha bisi chiknwi romwi rí śuma thak ya bwrwi khoroksa tongo. ²⁶Bo belaino sak tekto man kha. Kwbangma daktorrok bini sak nai kha, bebak rang swbai baiwi sak najak phano bini sak ham li ya. Teibo se sak dera si-o.

²⁷A bwrwima Jisuni kókno khna kha hakhe kubun bororok bai baksa bono rwktharwi thángwi bini kamchwlwi tangwi kha. ²⁸“Ang bini kamchwlwi kisa ma tang kheno ham anw” hwnwi bo uansuk kha. ²⁹Kamchwlwi tangma logi logi’-no bini th́wi thak kha. Hakhe bini bebak hamyarok ham kha hwnwi bo saui man kha. ³⁰Hakhe logi logi’-no bini aroni phan ongkhorwi thángmani Jisu saui manwi bo bathak kha, tei yang uyang naharwi, “Sabo ani rírok tang kha?” hwnwi bo swng kha.

³¹Sagrírok Jisuno hai hwnwi sa kha, “Borok kwbangma kese-rebe khe nono dagarwi tong phai bai-o. Yang nwng khe, “Sabo tang phai kha” hwnwi se swngwi tongo.

³²Phiya bono tangnaino Jisu ayang-uyang naisigwi tong kha. ³³A bwrwimabo hammanino saui man kha, hakhe bini yakung yaphango klaiwi khulum phai kha. Bo kirima bai kwlwi twt́wi bebak wngmano Jisuno saui khna rw kha. ³⁴Bo bono hai hwnwi sa kha, “Khajani bwrwima, nwng ham rwjakmani hwn khe poito

khlaima bai se. Tabuk kwchang kwchang khe tháng si di; Nwng tei sak tekto man glak.”

³⁵Jisu kók saui tong phuru thumnokni twíphang Jairni nokni khoroknwi khoroktham borok phai lai kha. Bórok hai hwnwi sa kha, “Nini sajkw thwi kha. Hodakrano tei leng rwna nang li ya.”

³⁶Phiya a bororok sa phaimano Jisu khunju kan li ya. Bo thumnokni twíphangno hai hwnwi sa kha, “Ta kiri di; poito simi khlai di.”

³⁷Pitor, Jakob tei Jakobni takhuk Johonsongno simi se Jisu bini logi-o tlang si-o. ³⁸Bórok thumnokni twíphangni nogo sógwi khe, Jisu borok kwbangmano chirikhogwi kap laijak tei kutuk laijak nugwi kha. ³⁹Bo nogo habwi hai hwnwi sa kha, “Tamo wngwi norok aswk kaplai-koglai tei aswk kutuk lai tong lai? O chwrai thwi ya. Bo thu-ui se tongo.” ⁴⁰Phiyaba jotono bono mwnwi lai kha.

Jisu bororokno a nokni ongkhor di hwnwi sa kha. Hakhe a chwrai tongma khotolo bo habwi kha. Bini logi-o chwrai buma bupha tei bini khoroktham sagrai logi-o twíwi khotolo habwi kha. ⁴¹Hakhe Jisu a chwrai yak romwi hai hwnwi bono sa kha, “Talitha Kum!” (Abo khe o “bwrwima, ang sa-o bacha di!” hwnma se). ⁴²Hakhe a bwrwima logi logi’-no bacha kha tei himna cheng kha. (Bini umor hwn khe nokha bisi chiknwi). Buma bupha tei sagraiok belaino uanajak bai kha. ⁴³Jisu, buma buphasongno o wngmano buino ta sa di hwnwi ragdama khilai saui rw kha. Hakhe a bwrwimano mungsaswk chá rw di hwnwi bórokno dagi kha.

Bo Tongma Kamiyungo Jisu Thángmani

6 ¹Aboni ulo khe bo tongma kamiyungo Jisu kiphilwi tháng kha. Bini sagraiokbo baksa tháng lai kha. ²Sabat salo Jisu thumnogo phrwngwi kha tei borok kwbangma bo phrwngmano khna kha. Bórok uanajagwi hai hwnwi sa lai kha, “O borok buroni o phrwngmungno man kha sla? Bahai khe bo omo twí aswk elem man kha? Bono omo sabo rw kha? O uanamasingcha samung tangnani phan bo buroni man kha? ³O borok chwng sinimani

Mariamni sajla, Jakob, Josi tei Simonni takhuk a mistrisa ya diba? Bini hanokjwksong tabukbo o kamiyungo tongnairok ya diba? Hakhe bórok bono yachaknani udru-mudru wngwi tong lai kha.

⁴Ulo Jisu bórokno hai hwnwi sa kha, “Diyari bini kamiyungni borok bai, bini sandairok bai tei bini nokni bororokno karwi kubun bebak jagani bororok bai’-no bórom rwjago. ⁵Khoroknwi kulum gwnang borokni saka-o yak beraui ham rwmano karwi Jisu aro-o tei mungsa uanamasingcha samung tangwi man li ya. ⁶Aroni borokni poito kwrwi wngmani nugwi bo belai uanajak kha. Hakhe bo a amchoini kubun kamirogo thángwi phrwngwi kha.

Jisu Chonghorrokno Kók Pírna Rohormani

⁷Jisu bini khorok chiknwi chonghorrokno thansa khe ring kha. Bo bórokno khoroknwi khoroknwi khe rohor bai kha tei bórokni saka-o mwtaí hamyarokno rwxhlainani phan rw kha.

⁸Bo bórokno hai hwnwi sa kha, “Norok tháng thani himna bagwi raidang kongsano karwi tei mungsa phano ta twí di. Rutibo ta twí di, solabo ta twí di, rang puisarokbo ta twí di.”

⁹Norok yaklaprok káui mano, tamo khe rí bárarok ta tlang di.

¹⁰Norok nok khungsa swgo kasai khe kamiyung yakar yasak a nogo’-no tong di. ¹¹Tumungno kamiyung khungsaswkni bororok norokno yachak ya hwn khe eba norokni kókno khna ya khe, a kamiyungni kutulwi tháng di tei yakung hadulwi bupraui bórokno hus khlaiwi kabu di.”

¹²Chonghorrok aroni kutulwi kubun jagarogo tháng kha. Bórok bororokno bórokni bwkharok tei tongmungrok slái di hwnwi sa kha. ¹³Bórok kwbangma mwtaírokno bororokni aroni rwxhlai kha tei hamya kwbangmano olib thok phulwi ham rw kha.

Herod Jisuno Baptisma Rwnai Johon se Wng khna hwnwi Uansukmani

¹⁴Bugra Herod Jisuni kókno khna kha, tamoni hwnma le Jisuni mung tor rwrwkma bai baksa bororok hai hwnwi sa lai kha, “Bo

baptisma rwnai Johon se. Bo sói kwthwini thangwi bachanai se, aboni bagwino bo omo hai uanamasingcharok khelaiwi mano.”

¹⁵Baksa bororok khe, “Bo Elia se” hwnwi sa lai kha. Tei baksa hwn kheba, “Swkango tong langnai diyarirok hai’-no bo khoroksa diyari, hwnwi sa lai-o.”

¹⁶Herod Jisuni o kórok bebakno khna bai khe, bo hai hwnwi sa kha, “Ang Johonno bokhorok tanwi buthar kha. Bo tabuk kwthwini bacha phi kha!”

Baptisma Rwnai Johon Bahai Khe Butharjak Kha

¹⁷Herod bo baithangno bini sengkrakrokno Johonno romwi alongo chopnanai dagi kha. Herod bo bihik Herodiano khá ham rwna bagwi se o samungno tang rw-o. Bo Herodni takhuk Philipno káijakmani phiya tabuk hwn khe Herod se bono káijak si-o. ¹⁸Johon Herodno hai hwnwi sa kha, “Nini takhukni hikno nwnng káijakmani abo kisa phano cha ya.” ¹⁹Hakhe Herodia Johonno naislerjak kha. Bo Herodno saui Johonno buthar rwna naimani, hai phano butharwi man li ya. ²⁰Herod Johonno borok kaham tei kwthar hwnwi saui manma bai bono butharnani kirijago. Hakhe bo bono kati rwui ton kha. Johon sama bai bini thani-o kwbangma swngmungrok achai phano bo Johonni kóknó belaino khnana muchungjago.

²¹Hakhe Johonno butharnani sói sep Herodiani thani phaiwi sók phai kha. Abo wng kha Herodni achaima salno rwgwi phandani sal, bo bini naikolphangni tangphang kotor kotorrokno, sengkrak okrarokno tei Galilini kolok kotorrokno t́wiwi chá laima panda khlai kha. ²²Herodiani bwsajwk achaima salno rwksau panda khlaime-o phaiwi mwsa phai kha. Hakhe Herod tei bo bai baksa panda-o cháui tongnairok bono belai hamjak kha.

Aboni bagwino Bugra Herod a bwrwimano hai hwnwi sa kha, “Nwnng tamo san abonono ang nono rwnai.” ²³Bo bono swmai tangwi hai hwnwi sa kha, “Jesa phano nwnng ano san di, abo ha khaksa phano wng thung ang nono abono rwnai.”

²⁴A bwrwima bumani aro thángxwi, “Ang bugra Herodni thani ano rw di hwnwi tamo sannai?” hwnwi s'wngwi kha.

Buma “Baptisma rwnai Johonni bokhorokno san di” hwnwi sa kha.

²⁵Hakhe logi logi'-no a bwrwima bugrani thani kipphilwi thángx kha. Bo bono “Ano tabukno mairango khilaiwi baptisma rwnai Johonni bokhorok rw phai di” hwnwi sa kha.

²⁶Bugra Herod belaino bwkha hamya wngjak kha, hai phano nograirokni bwskango swmai tangmano bo nornani muchungjak li ya. ²⁷Bo Johonni bokhorokno tanwi bini thani tubuna bagwi sengkrak khoroksano rwi rohor kha. Hakhe a sengkrak alongo thángxwi Johonni bokhorokno tanwi kha. ²⁸Bo mairango khe bokhorokno tubui phai kha tei a bwrwimano abono rwui rw kha, hakhe a bwrwima bumano abono yapharwi rw kha. ²⁹Johonni sagrirok a wngmarokno khna khe, bórok phaiwi Johonni mang kwthwino tlangwi phobwi rwi lai kha.

Khorok 5000-ni Slái Kwbang Bororokno Jisu Chá Rwmáni

³⁰Kók pírna bagwi Jisu bai rohorjak chonghorrok bini thani kipphilwi phai laiwi bórok joto khilaimani tei phrwngmano bono saui khna rw kha. ³¹Jisu bai bini sagrirok belaino pái lai ya-o tongo. Bororok kwbangma aro tongmani bagwi Jisu bai bini sagrirok mai chánani jora suda man li ya. Bo bórokno hai hwnwi sa kha, “Ang bai baksa phai di; siring siring jaga-o chwng simi thángx lai anw. Aro-o chwng kisa lenglalui man anw.”

³²Hakhe Jisu bai bini sagrirok simi thángx lai kha. Bórok borok khoroksa phano kwrwi siring-siring kwrwngsa-o rung bai thángx lai kha. ³³Phiya borok kwbangma bórok thángxmanino nuk kha tei bórokno siniui man rwk kha. Hakhe kamiyung brúm-brúmni bororok bórok thángxwi tongma-o Jisuni slái swkangno khachigwi sógwi tongwi lai kha. ³⁴Jisu rungni ongkhor kheno borok kwbangmano bono naising laijak nuk kha. Bo bórokno belaino khairokjak kha, tamoni hwnma le bórok mwrwknaí

kwrwi mera hai wngwi tong bai kha. Hakhe bo bórokno kwbangmano phrwng kha.

³⁵Sal thángx twtúi wng khe Jisuni sagrirok bini thani phaiwi hai hwnwi sa kha, “Oro bororokbo tongnai kwrwi tei salbo thángx twtúi wngwi tong kha. ³⁶Hakhe borokno rwi rohor si di. Gana-ginini kamiyungrogo chámung paiwi chána bagwi bórok thángxna nango.

³⁷Phiya Jisu bororokno hai hwnwi sa kha, “Bórokno chá rwna bagwi norok kisa chámung rw gra di.

Bórok Jisuno hai hwnwi sa kha, “O borok kwbangmano chá rwna bagwi aswk ruti kwbangma chwng paiwi man glak. Chwng talsa joto tangwi aji khe se aswk kwbang ruti paiwi man anw!”

³⁸Jisu bórokno hai hwnwi swng kha, “Tabuk norokni yago lep bwswk ruti tong? Thángxwi nai gra di.”

Bórok bórokni rutino lekhauí nai lai kha. Bórok Jisuni thani phaiwi hai hwnwi sa kha, “Chini yago ruti lepba tei a maknwi tongo.”

³⁹Hakhe Jisu bórokno hai hwnwi sa kha, “Jabra kwkhrang saka-o buthup buthup khe jotono achuk di hwnwi sa di.”

⁴⁰Hakhe joto bororokno buthup buthup khe achuk lai kha. Kaisa kaisa buthubo khorok bachi 50 eba khorok 100 swk wng anw.

⁴¹Jisu ruti lepba tei á maknwi nauí nokha saka naisauí chámungni bagwi Kaitorno hambai rw kha. Ulo bo ruti swkangwi bororokno rwna bagwi sagrirokno yapharwi rw kha. Hakhe bo a maknwinobo borokno bagwi rw kha.

⁴²Bórok ok pung ya sakno chá lai kha. ⁴³Bórok chá baima yagulo sagrirok ruti bai a chá bai ya bára tong rwkmano khochauí ura chiknwi supung kha. ⁴⁴Aro-o chá lainairok chwlarok simino khorok 5000 wng anw.

Jisu Twi Saka Twi Himmani

⁴⁵Aboni ulo Jisu Bini sagrirokno rung bisingo hap di hwnwi sa kha. Bo bórokno twibom ayang nar Betsaida-o thángx di hwnwi sa kha. Bo hwn khe ulo phai anw hwnwi bórokno sa kha. Bo aro

tong rwkmani hwn khe jotonono nogo thángx si di hwnwi sanani bagwi se. ⁴⁶Bo bórokno kak lai kha do, hwnwi saui hathai saka-o surina thángx kha.

⁴⁷A horo, rung hwn khe twibom kwcharo tei Jisu khe ha bwkhak saichung susuk. ⁴⁸Bo twibom kwcharo rungno nuhur kha. Nokbar sibchama pail cha ya wngma bai sagrirok rung chokthokjak ya wng tongmano bo nuhur kha. Phungni damtham bai damdokni kwcharo twi saka twi himwi bo rungni bwkhak thángx kha. Bo rung láí twtwi wngwi suda himwi tong kho. ⁴⁹Phiya ba sagrirok Jisuno twi saka twi himwi tongmani nuhur kha. Bórok bono burasa hwnwi uansugwi chirikhok lai kha. ⁵⁰Bórok jotono bono nainani kirijak lai kha. Phiyaba bo bórok bai kók sa laiwi hai hwnwi sa kha, “Ta uana di; omo ang se! Ta kiri di.” ⁵¹Bo sagrirok bai baksa rungo kasau khe nokbar thagwi thángx kha. Hakhe sagrirok belaino tongthokjak kha. ⁵²Abo tamo wng kha bórok poito cháui man li ya. Omo bo a ruti bai uanamasingcha khlaima hai wng kha. Bórok omorok tamo hwnmani abo romwi se man ya kho.

Sak Hamya Kwbangmano Jisu Ham Rwmani

⁵³Jisu bai bini sagrirok twibom láíwi Genesaret rukungo sók phai kha. Bórok aro-o rungno kha lai kha. ⁵⁴Bórok rungni ongkhor kha hwn khe, aroni bororok Jisuno nuk kha. Bórok bo sabo abono saui man kha. ⁵⁵Hakhe a amchoi gwnangwi bebak bororokno sanani bagwi bórok khachigwi thángx lai kha. Jisu thángxthani lamthai-o khe sak hamyarokno bórok tubu lai kha. ⁵⁶Jisu a amchoini kamiyungrogo, kamiyung kotooro tei khamparrogo thángx brúm-brúmno bororok sak hamyarokno hati kwcharo tubu lai kha tei bini kamchwlwini jesa jaga-o phano tang rw thung hwnwi koi lai kha. Tei bo tangmani bebak bororok'-no ham bai kha.

Kaitorni Kerong Tei Bororokni Tongmung Chámung

7 ¹Jerusalemni phainai khoroksa khoroknwi Pharisairok bai kerong phrwngnairok Jisuni thani kuthum phai lai kha.

²Bórok bini baksa sagrirokno kaham khe yak sú yaiu chámáni nuk kha. ³Pharisairok bai bebak Judairok chámáni swkang kaham khe yak sú yasak chámungrok chá ya. Bisi kwdwkma swkango tong langnai bórokni kotor kotor twíphangrokni aroni manrwkma raidarokno swrwngwi se bórok omorok khelai lai-o. ⁴Tei Judairok hatini mungsaswk manwirok pai khe kaham khe sú yasak chá ya. Bórokni slái swkang tongwi thángx langnairokni raidaroknobo bórok rákhogo. Bórok khurok, golarok tei lota ³ sújaknai raidarokno rákhogo.

⁵Pharisairok bai kerong phrwngnairok Jisuno hai hwnwi sa kha, “Nini sagrirok chini slái swkang tong langnai kotor kotor twíphangrokni aroni man rwkmani tongmung chámungrokno rákhok ya. Bórok yak sú yaiu’-no mai chá-o. Tamoni bagwi bórok omo hairok khelai?”

⁶Jisu hai hwnwi sa kha, “Norok wng kha bebak phatrarok mángx. Norokno twíwi Kaitorni kókno Jisaia swilangmani abo sói se:

‘O bororok kók bai ano bórom rw-o,
phiya bórokni thani-o ang mungsa buya.

⁷ Bórok ereng ereng ano suri-o.

Borok bai swnamjak raidarokno simi se bórok phrwngo.’

Jisaia 29:13

⁸Norok Kaitorni dagimano rákhok yaiu bororok bai banokjak buini aroni manbumani raidarokno se chajak kuk si-o.”

⁹Hakhe bo hai hwnwi sa kha’ “Nwng Kaitorni kerongno rákhok ya khe tongwi sak bai swnamjak kerongno rákhokna lama swnamtina khe le katswi kwrwng kuk.” ¹⁰Musi hai hwnwi sa kha’ “Norokni ma-phano bórom ma se ma rwnai.” Bo hai hwnwibo sa phi kha, ‘Buma eba buphano hamya sanai borok bo butharjakna

³**7.4: Lotarok** baksa Grik bijabo chukirok dajak tongo.

se nangnai.’¹¹Phiyaba norok akhini bororokno bórokni buma eba buphano, ‘Ang nono mungsaswk bai chubaiui le mano, tamo khe ang abono nono rw glak. Ang Kaitorno se rwnai’ hwnwi mano hwnwi phrwngo. ¹²Norok bororokno bórokni buma-buphani bagwi mungsa khilaijaknai kwrwi hwnwi sa-o. ¹³Hakhe Kaitor samano khilai ya phano wngo hwnwi norok bororokno phrwngwi tongo. Norok buino phrwngmani norokni chuchusongni aroni manrwkmani raidarokno se rákhokna nang kugo hwnwi uansuk lai kuk si-o. Tei abo hairok teibo norok khilai lai-o.”

¹⁴Haino hai Jisu bororokno ringwi hai hwnwi sa kha, “Norok jotono ani kókno khna bai di tei ang samano si bai di. ¹⁵Phatarni bororokni khúgo habwi hamya khlainai abo twí manwirok mungsa kwrwi. Bisingni phataro ongkhornairok se bororokno hamya khilai-o. ¹⁶⁴

¹⁷Hakhe Jisu bororok bai kak laiwi nok bisingo habwi kha. Sagrirok Jisuno bo bororokno tamo sa kha abono swng kha. ¹⁸Bo hai hwnwi sa kha, “Norok tabuk phano romwi man ya kho da? Phatarni borokni khúgo habwi Kaitor bai yachakjak ya wng ya abo norok kaham khe saui mano. ¹⁹Chámungrok borokni bwkha-o habwi man ya. Abo bohogo se habwi thángo. Ulo khe abo sakni phataro ongkhorwi thángo.” (Jisu omo samani hwn khe bororok o cháui man ya abo twí chámung kwrwi hwnwi samani se.)

²⁰Hakhe Jisu hai hwnwi sa kha, “Bisingni phainai manwirok se borokno hamya khilai-o. ²¹O bebak hamyarok borokni kháni bisingo se chengsagra-o; hamya uansukmarok, sakmotokni sumsokrok, khókmani, borok butharmani, ²²buitali-buitala wngmani hamya manna muchungmani, bororokni hamya khilaimani, tatal samani, hamya hwnwi saui man twtwí khilaimani, khámaimani, lachi rwmani, kók kotor samani tei butua tongmung tongmani. ²³O hamya manwirok se borokni

⁴7.4: baksa Grik bijabo “khunju tong khe ba, ani o kókno khna dil!” o kókthai tongo.

bisingni phai-o. O manwirok se bororokno Kaitor bai yachakjak ya khelai-o.”

Jisu Buini Dophani Bwrwino Chubamani

²⁴Jisu aroni kutulwi Tur ganani amchoi-o tháng kha. Bo a amchoini bororokno bo aro tongo hwnwi si rwna muchungjak ya, hakhe bo nok khungsa-o kasau kha. Phiyaba bo huijagwi tongwi man li ya. ²⁵Bo aro tongo hwnwi bwrwima khoroksa khna kha. Bini sawk kusu phola hamya bai kolobjak. Hakhe a bwrwima Jisuni aro phaiwi yakungo klaiwi khulum phai kha. ²⁶Bo Judai bosongni bwrwi ya. Bo Siriya amchoini Phoinikia-o achainai borok se. Bo Jisuno bwsajwkni sakni mwtaí hamyano rwxhlai ja di hwnwi koiwi sa kha.

²⁷Jisu a bwrwimano hai hwnwi sa kha, “Bwsarokni rutino nauí swírokno rwmani abo cha ya. Bwsarokno’-no ok pungsak jora twí swkang chá rwna nango.” ²⁸Bo hai hwnwi sa kha, “Abo sóino Subrai. Hai phano, bwsarokni chá bai ya bára ha-o klai tong rwxkmano le swírokbo cháui man bla.

²⁹Hakhe bo hai hwnwi bono sa kha, “O kók le belaino kubui se. Nwng tabuk tháng si di. Mwtai hamya nwsajwkno yakarwi tháng kha.”

³⁰A bwrwima nogo kiphilwi tháng kha tei bwsajwkno thuyamo rokojak nugwi kha. A mwtaí hamya bono yakarwi klang kha.

Jisu Nathong Khoroksano Ham Rwmani

³¹Aboni ulo Jisu Tur amchoi yakarwi Sidon twí tháng kha. Galili twibomo tháng phuru bo kamiyung kaichi amchoi bising twí tháng kha. ³²Bo aro tong phuru, khoroknwi khoroktham bororok nathong tei kaham khe kók sauí man ya borok khoroksano bini thani tubui phai kha. A bororok bini saka-o yak beraui bono ham rw ja di hwnwi Jisuno koi kha.

³³Jisu a borokno swkagwi saichung khelai bo bai tlangwi tháng kha. Bo a bororokni khunjju-o bini yasirok sora kha. Aboni ulo

yasi-o khúktwi musu-ui a bororokni bwslaino tang kha. ³⁴Jisu nokha saka naisau hama kolok khe sotonwi rohorwi hai hwnwi sa kha, “Ephata.” (Abo “phiyokjak di!” hwnmani se). ³⁵Omo hai khlaima logi logi’-no a borok khunju khna kha. Bwslaibo bor man kha tei kaham khe kók sanabo cheng kha.

³⁶Jisu a bororokno kubun tei khoroksano phano ta sa di hwnwi sau rohor kha. Yang le bo ta sa di hwnwi sa rwrwk phiyaba a borok khe teibo buino pí rwrwk. ³⁷Bórok bebakno belai khe uanajak baiwi hai hwnwi sa lai kha, “Naisik bai di bo tamo khlai kha. Bo khlaimarok bebakno kaham. Nathongnobo khna rw kha, bobanobo kók sa rw kha.

Khorok 4000-ni Slái Kwbang Borokno Jisu Chá Rwmani

8 ¹Tei uaisa Jisuni logi bororok kwbangma kuthum phai kha. Bórokni aro chájaknai mungsa kwrwi kha. Hakhe bini sagrirokno bini thani ringhorwi, hai hwnwi sa kha, ²“O bororokni bagwi ani khá belai hamya wng la ha. Bórok saltham romwi ang bai máng, tabuk khe bórok chánani se mungsa kwrwi. ³Ang bórokno ok khuijak khilaiwi le nogo rohorwi man li ya. Chá yaui bórok tháng khe, nok lama-o se leng bai anw. Bórokni bisingo baksa hakchalni phainaibo tongo.

⁴Jisuni sagrirok hai hwnwi sa kha, “Chini gana-gini kamiyungrokbo kwrwi. O bororokno chá rwna bagwi chwng buroni aswk ruti mannai?”

⁵Hakhe Jisu bórokno hai hwnwi swng kha, “Norokni thani ruti lep bswk tong?”

Bórok “Chini thani ruti lepsni se tongo” hwnwi sa kha.

⁶Jisu a bororokno ha-o achuk di hwnwi sa kha. Hakhe bo a lepsni rutino nau Kaitorno hambai rw kha. Bo a rutino swbaiwi bini sagrirokno yapharwi bórokno banta khilai rw di hwnwi sa kha. Hakhe bórokbo bo sama haino khlai kha. ⁷Sagrirokni thanibo á bwsa bwsa kisa tongo. Jisu áni bagwi hambai rw kha tei abórokno bororokno banta khilai rw di hwnwi yapharwi rw kha.

⁸Bórok ok pungya sakno chá lai kha. Aboni ulo chá bai ya bára tong rwkmano ura khungsni sagrirok khochaui supung kha. ⁹Aro chánairok chwlarok simino khorok 4000 swk wng anw. Cháui pái khe Jisu bórokno nogo tháng si di hwnwi sa kha. ¹⁰Hakhe bo rung bai khe bini sagrirokno t́wiwi Dalmanutha amchoi-o tháng kha.

Baksa Baksa Bororok Jisuni Phanno Potaliui Naina Naimani

¹¹Pharisairok phaiwi Jisu bai tokra rw lai kha. Bórok bono potaliui naina nai kha. Hakhe bo Kaitorni aroni phai-o aboni mari phunugwi kaisa soidomni samung khilai di hwnwi bórok sa kha. ¹²Jisu hama kolok rohorwi hai hwnwi sa kha, “Tamo wngwi norok soidomni samung naina hwn? Ang sóino kubui kók sa-o, norokno mungsa swk phunukna bagwi soidomni samung khilaijak glak.” ¹³Hakhe Jisu Bórokno yakarwi twibom ayang naro rungo kasaui tháng kha.

Jisuni Sagrirok Bono Romwi Man ya Wngmani

¹⁴Rungo sagrirokni thani ruti lepsa susuk se tongsi-o. Bórok ruti kwbang tubunani pokjak lai kha. ¹⁵Jisu bórokno ragdama khilai hai hwnwi sa kha, “Hus wng di! Norok Pharisairokni chuan tei Herodni chuan bai hus khe tong di.”

¹⁶Sagrirok omo tamo hwnmani wng kha hwnwi sa laiwi hai hwnwi sa kha, “Chini yago ruti kwrwi wngwi se bo o kókno sa-o.”

¹⁷Jisu, sagrirok o kókno t́wiwi sa laiwi tongo hwnwi saui mano. Hakhe bo bórokno hai hwnwi swng kha, “Norok tamo wngwi ruti kwrwi hwnwi sa laiwi tong lai sla? Tabuk phano norok nuk ya kho da eba romwi man ya kho da? Norok aswk da romnani phan kwrwi gwja? ¹⁸Mokol tong twt́wi norok nuk ya diba? Khunju tong twt́wi norok khna ya di ba? Chini yapha-o ruti kwbang kwrwi phuru ang tamo khilai kha, muito khilaiwi nai di? ¹⁹Ang ruti lepbano khorokbasaino(5000) banta khilai rw kha. Chá bai ya

bára tong rwkmarokno norok ura khung bswsk supung kha, muito khelai nai di?”

“Chwng ura khung chiknwi supung kha” hwnwi sagrirok sa kha.

²⁰“Tei ang auang lepsnino banta khelaiwi khorok brwisaino (4000) rw phuru, chá bai ya bára tong rwkma bai norok ura khung bswsk supung kha?

“Ura khungsni” hwnwi bórok sa kha.

²¹Hakhe bo bórokno hai hwnwi sa kha, “Ang khclairarokno norok muido mano, ahai phano se norok romwi se man ya gwja?”

Betsaida-o Phula Khoroksano Jisu Nuk Rwmani

²²Jisu bai bini sagrirok Betsaida-o phai lai kha. Khoroknwi khoroktham bororok phula khoroksano bini thani tubu lai kha tei a borokno tang di hwnwi bono koiwi sa kha. ²³Hakhe Jisu a phulani yak romwi kamini phataro tlangwi thángx kha. Aboni ulo bo a borokni mokolo khúktwi musu-ui rw kha. Hakhe bini saka-o yak beraui hai hwnwi swng kha, “Tabuk nu da nuk kha?”

²⁴A borok saka naisau hai hwnwi sa kha, “Au, ang bororokno nugo. Bórok buphangrok himwi tongma hai.”

²⁵Haino hai Jisu a borokni mokolo yak bera kha tei a borok mokol kotor kotor khe phiyok kha. Bini mokol kolnwnwi'-no hamwi thángx kha tei bebak manwirokno bo srai srai khe nuk kha. ²⁶Jisu bono nogo thángx di hwnwi sa kha. Bono “Kamiyungo ta thángx di” hwnwi sa kha.

Pitor Jisuno Masia Hwnwi Samani

²⁷Jisu bai bini sagrirok Kaisaria Philipi amchoini kamiyungrogo thángx lai kha. Bórok himwi tong lai phuru, Jisu sagrirokno swng kha, “Bororok ano sabo tamo hwn?”

²⁸Bórok hai hwnwi sa kha, “Baksa bororok nono baptisma rwnai Johon hwno. Baksa khe Elia hwno. Tei baksa kheba diyariokni bere khoroksa hwnwi sa-o.”

²⁹Hakhe Jisu bórokno hai hwnwi s'wng kha, “Norok le Ano sabo tamo hwn? Pitor hai hwnwi sa kha, “Nwng wng kha Masia.”

³⁰Jisu sagrirokno hai hwnwi sa kha, “Ang sabo, o kókno khoroksano phano ta sa di.”

Bo Thwina Se Nangnai Hwnwi Jisu Samani

³¹Aboni ulo Jisu bini sagrirokno borokni sajla katswi ma se ma sátokjakna nangnai hwnwi phrwng kha. Judai okrarok bai tei kerong phrwngnairok bai norjakna nangnai. Bo hai hwnwi sa kha borokni sajla butharjagwi se ma thwinai tei salthamni ulo bo kwthwini thangwi bacha phinai.

³²Jisu bórokno tamo wngnai abórokno bebakno saui khna rw bai kha. Bo mungsano phano huiwi ton li ya.

Pitor Jisuno kubun sagrirok bai swkagwi saichung susuk khe kók sana tlang kha. Pitor a borok sama bagwi Jisuno chajak ya wng kha. ³³Phiya Jisu bini sagrirokni bwkhak uphilwi naisik kha. Hakhe Pitorno kudiui hwn kha. Bo Pitorno hai hwnwi hwn kha, “Soitan! ani oroni kutul lang di! Kaitor naimarokno nwng nangjak ya. Borok nangjakkukmano se nwng torjago.”

³⁴Hakhe Jisu bororokno tei bini sagrirokno bini thani ringwi hai hwnwi sa kha, “Norokni bisingo ani sagri wngna muchungnairok bórok sak sakni kók ta uansuk thung tei bini krus balwi ani logi phai thung. ³⁵Norokni bisingo kwthang tongna muchungnai borok bo thwinai. Phiya ani bagwi tei kothoma kahamni bagwi langma rwnai bo thangnai. ³⁶Nwng sak baithang se kwmajak hwn khe bebak hayungno man phano mungsa manma klai ya. ³⁷Nini langmano nwng rang rwui haino hai paiwi man phi glak. ³⁸Tabukni bororok sumsok bai máng kupulung. Bórok Kaitorni kók khna ya. Bórokni bisingo nwng tong phano, ani bagwi tei ani phrwngmungni bagwi ta lachi di. Tumungno nwng lachijak khe tei angbo ani Aphani ch'wngsacha tei kwthar suarirok bai phai phuru lachijaknai.”

9¹Hakhe Jisu hai hwnwi sa kha, “Ang samani kókno poito khelai di, oro bachau tongnairokni bisingo baksa thwi ya sini swkangno Kaitorni ha kwplai khe phaima nuk anw.”

Musi tei Eliasong bai khe Jisuno Nukmani

²Saldok salni ulo, Jisu Pitor, Jakob tei Johonsongno t́wiwi hathai saka-o kasau th́ng kha. Aro-o bórok simino. Sagrirok bono naisigwi tong phuru, Jisuni mul philjagwi th́ng kha. ³Bini ŕrok kwchwng kuphur wng kha, hayungno khoroksa phano abo hai kuphur khelaiwi mannai kwrwi. ⁴Aphuru borok khoroknwi Jisu bai kók sau tong lai-o. Bórok wng kha Musi tei Elia.

⁵Pitor Jisuno hai hwnwi sa kha, “Hoda chwng oro tongmani abo kahamno. Chwng oro-o basai khungtham tang anw, nini bagwi khungsa, Musini bagwi khungsa tei khungsa khe Eliani bagwi.” ⁶Pitor tamo sanai sa ya kisa phano sau man li ya, tamoni hwnma le bo bai tei khoroknwi tongnai sagrirok belaino kirima hapjak.

⁷Hakhe chumui dulsa phaiwi bórokno kobol phai kha. A chumuini bisingni o kók sajak kha, “Bo’-no ani Sajla, bonono ang belai hamjak kugo. Bini kók khna di!”

⁸Sagrirok ayang-uyang naisigwi nai kha, hai phano Jisuno simi se bórok bai nuk si-o.

⁹Jisu bai sagrirok hathaini ongkhorwi phai lai phuru, bo bórokno omo hairok hwnwi dagi kha: “Hathai saka-o norok nukmarokno borokni sajla kwthwini thangwi bacha yasak jora khoroksano phano ta sa di. Aboni ulo se norok nukmarokno bororokno sa di.”

¹⁰Hakhe sagrirok bono nukmano sana bagwi naising laiwi tong lai kha. Hai phano kwthwini thangwi bacha phinai hwnwi Jisu samani abo tamo hwnmani hwnwi bórok kiching bórok sa lai kha. ¹¹Bórok Jisuno hai hwnwi swng kha, “Elia se swkang phai granai hwnwi tamo wngwi kerong phrwngnairok sa sla?”

¹²Jisu hai hwnwi sa kha, “Elia’-no swkang phai granai hwnwi

bórok samani abo sóino. Eliano bebakno thiti khlai klangnai. Hakhe tamo wngwi borokni sajla mar khe sátokjagwi tei bororok bai norjaknai hwnwi Elembago swijak tong sla? ¹³Ang norokno sa-o, Elia phaiwi se tháng kha. Bororok bono joto hamya khlaina muchungmarok khlai se pái kha. Omorok wngnai hwnwi Elembago sajak tongo.

**Mwtai Hamya Kolobjak Chwrai
Khoroksano Jisu Ham Rwmani**

¹⁴Aboni ulo Jisu Pitor, Jakob tei Johonsong kubun sagrirokni aro tháng lai kha. Bórok aro borok kwbangmano nuk kha. Kerong phrwngnairok sagrirok bai tokra rw laiwi tong lai kha. ¹⁵Bororok Jisuno nuhur khe, belai uanajak kha tei khachigwi thángwi bono lamsogwi kha.

¹⁶Jisu hai hwnwi swng kha, “Kerong phrwngnairok bai norok tamono twíwi tokra rw laiwi tong?”

¹⁷Borok khoroksa hai hwnwi sa kha, “Hodakra, angslano ang nini thani tubumani. Bo mwtai hamya bai kolobjak aboni bagwi bo kók saui man ya. ¹⁸A mwtai hamya kolob phai khe bono ha-o songraui rw-o. Búkhúgo khúktwi phena phena kari-o, bua hulo tei bini sak raksauí thángo. Ang nini sagrirokno o mwtai hamyano rwkhlai di hwnwi sa kha, hai phano bórok rwkhlaiwi man li ya.”

¹⁹Jisu hai hwnwi sa kha, “Norok tabukbo poito khlai ya gwja! Norok bai ang tei sal bswsk ma tong langno? Norokno ang tei sal bswsk khá lokna nangno? A chwraino ani thani tubu di!”

²⁰Hakhe sagrirok a chwraino Jisuni thani tubu kha. A mwtai hamya Jisuno nuk kheno, a chwraino kolob phai kha. Hakhe a chwrai ha-o klaiwi pra-pra wngwi búkhúk twí khúktwi phena phena kariui tong kha.

²¹Jisu a chwraini buphano, “Bo omo hai wngmani sal bswsk wng kha?” hwnwi swng kha. Chwrai phangsini simino hwnwi bupha sa kha. ²²A mwtai hamya bono hórrogo eba twi-o khiklaiwi

butharnani kwbangmano nai kha. Nwng mungsa swk khelai man khe chwngno khairogwi kisa chuba ja di.”

²³Jisu buphano hai hwnwi sa kha, “Nwng man khe ba hwnwi tamo wngwi sa ba?” Poito khelai kha hwn khe bebakno wngwi mano.”

²⁴Logi logi’-no bupha, “Ang poito khelai-o teibo poito khelaiwi manna bagwi ano chuba ja di!” hwnwi chirikhogwi sa kha.

²⁵Aro wngmano naina bagwi bororok khachigwi phaimano Jisu nugwi a mwtai hamyano hai hwnwi damrok kha, “O nathong bai kók man ya khlainai mwtai hamya —Ang bini bisingni ongkhor phai di hwnwi nono dagi-o, bini bisingo tei ta hap phi si di.”

²⁶A mwtai hamya chirikhok kha. Abo bai a chwrai haino hai ha-o klai tháng phi kha, hakhe a mwtai hamya bini aroni ongkhorwi tháng kha. Aphuru a chwrai kwthwi hai wngwi tong kha. Bororok kwbangma, “Bo ba thw se thwi khna bla!” hwnwi sa lai kha. ²⁷Phiya Jisu bini yak romwi bono bacha rw kha.

²⁸Hakhe Jisu nok bisingo habwi tháng kha. Sagrirok simi aro wngma bai bórok hai hwnwi swng kha, “Chwng khe tamo wngwi a mwtai hamyano rwxhlai man li ya sla?”

²⁹Jisu hai hwnwi sa kha, “Surima ⁵bai simi se abo twí mwtai hamyarokno rwxhlaiwi mano.”

Jisu Bini Thwinani Kókno Samani

³⁰Aboni ulo Jisu bai bini sagrirok aroni kutulwi Galili twí tháng lai kha. Bo buro tong abo Jisu bororokno sau man rwna muchungjak ya. ³¹Bo bini sagrirokno simi phrwngna muchungjago. Bo bórokno hai hwnwi sa kha, “Borokni Sajla kubun borokni thani yapharwi rohorjaknai, bórok bono butharnai. Salthamni salo bo kwthwini thangwi bachanai.” ³²Phiyaba bo tamo sa kha sagrirok abono romwi man li ya tei bono swbo swngnak li ya.

⁵9:29 **Surima** Baksa Grik bijabo surima bai ok bukcha kwrwi.

Sabo Kotor Kuk

³³Jisu bai bini sagrirok Kapharnaumo tháng lai kha. Bórok nok bisingo habwi kha tei Jisu bórokno hai hwnwi swng kha, “Norok lama-o tini tokra rw laimani ang khna kha. Norok tamono twíwi tokra rw lai?” ³⁴Phiyaba sagrirok mungsa phano pung lai li ya, tamoni hwnma le lama-o bórokni bisingo sabo kotor kuk hwnwi se bórok tokra rw lai phai lai-o.

³⁵Jisu achuk kha tei chonghor khorok chiknwirokno ringwi hai hwnwi sa kha, “Sakno nangjak kuknai borok khlaina muchungnairok bo buino se sakni slái nangjak kuknai ma khlai granai. Bo jotonono ma monthai.”

³⁶Hakhe Jisu chwrai khoroksano naharwi sagrirokni bwskango bacha rw kha. Bo a chwraino bamwi hai hwnwi sa kha, ³⁷“Ani mungwi omo hai chwrairokno yachaknairok ano'-no yachakma klai-o. Ano yachaknai borok bo ano rohornainobo yachakma klai-o.”

Chwngno Kebeng ya Borok Bo Chini Bwkhak Se

³⁸Hakhe Johon hai hwnwi sa kha, “Hodakra, chwng borok khoroksano nini mung bai mwtaí hamya rwkhlaimani nuk kha. Bo chini bisingni borok ya. Hakhe chwng bono ta khilai di hwnwi sa kha, tamoni hwnma le bo chini bodolni borok ya.”

³⁹Jisu hai hwnwi sa kha, “Bono ta mwthak di. Ani mung bai ha-o nuk ya samung kotor kotor khlainairok ano daktino hamya sa glak. ⁴⁰Chwngno kebeng ya hwn khe bo chini bwkhak se. ⁴¹Ang norokno sóino kubui kók sa-o, Khristoni borok hwnwi norokno khoroksa swk twi khan khe a borok sokat ma se mannai.

Sumsogo Klaimano Twíwi Jisu Hus Khilai Rwmani

⁴²O chwrairokni bere khoroksa swk ano poito khilai tongnai a chwraino khoroksa swk sumsogo khiklai khe, abo a borokni bagwi belaino hamya wngnai. Bini tota holongdap kotorma khau twijlango khiklai rwma se hamkuknai. ⁴³Tumungno nini yak

nono sumsok khilai rw khe, abono tansu-ui pái di. Yak kongnwi gwnang khe morkeni thwiphlai ya hóro thángmani slái yak kongsa kwrwi khilai mol brúmni langma manmani belai hamkugo. ⁴⁴⁶

⁴⁵Nini yakung tumungno sumsogo khiklai khe, abono tansu-ui pái di. Yakung kongnwi gwnang khe morke-o khiklaijakmani slái yakung kongsa gwnang khe molbrúm brúmni langma manmani belai hamkugo. ⁴⁶⁷⁴⁷Tumung nini mokol nono sumsogo khiklai khe, abono ekhregwi khibi di. Mokol kolnwi gwnang khe morke-o khiklaijakmani slái mokol kolsa t́wiwi Kaitorni ha-o hapmani belai kaham kuk. ⁴⁸Morke-o bororokno chánai yóngrok tei thwi phlai ya tei aroni hórho thwi phlai ya tong phlainai.

⁴⁹“Bebak bororoknono sóm rwjakma hai khe hórho rwjaknai. ⁸

⁵⁰Sóm belai kaham. Phiya abo pwrap ya wngwi tháng khe, nwnng abono tei kwprap khilaiwi man phi glak. Hakhe nini bisingni a sóm kahamno ta swkwma di. Tei kwchang kwchang khe tong lai di.”

Kaklaimano T́wiwi Jisu Phrwngmani

10 ¹Hakhe Jisu aroni kutulwi Judia amchoi-o tháng kha tei Jordon twima ayang narobo tháng kha. Borok kwbangma haino hai bini thani phai lai kha, hakhe salbrúm-brúm phrwngma hai kheno bórokno phrwng kua.

²Pharisai khoroknwi khoroktham bini thani phaiwi mungsa swk cha yarok bono sa rwna nai kha. “Borok khoroksa bini hikno kagwi rwmani abo sói da?” hwnwi bórok bono síng lai kha.

³Jisu hai hwnwi sa kha, “Musi norokno tamo khilai di hwnwi dagi?”

⁶9:44 Baksa Grik bijabo 44 bwtang tongo, a bwtang 48 bwtang haino.

⁷9:46 Baksa Grik bijabo 46 bwtang tongo, a bwtang 48 bwtang haino.

⁸9:49 Baksa Grik bijabo hwn khe, “Joto yapharmano’-no sóm bai kwprap khilaijaknai” Omo tongo. Swmai kwchamo yapharmarogo sóm rwjago. O bwtang Jisuni sagrirok sátok tekto bai amjokjaknai tei bórok sak sakno yapharmung hai khe Kaitorni thani ma yapharnai.

⁴“Kaksen swiwi rw khe hikno kagwi mano hwnwi Musi sa-o” hwnwi Pharisairok sa kha.

⁵Jisu hai hwnwi sa kha, “Kaitorni phrwngmungno norok yachak yani bagwi se Musi a dagimungno swi-o. ⁶Phiya Kaitor o hayung snam phuru, ‘borokno bo chwla tei bwrwi khilaiwi tak kha.’ ⁷‘Aboni bagwino borok buma bai buphano yakarwi bihik bai thansa wngwinai. ⁸Tei a khoroknwirok khoroksa wngnai.’ Hakhe bórok tei khoroknwi li ya, khoroksa se. ⁹Kaitor bórokno thansa khe thepau rw kha, hakhe khoroksa phano bórokno ta swkak si thung.”

¹⁰Ulo, sagrirok bai Jisu nok bisingo tong lai phuru, bórok kak laimano t́wiwi haino hai śwng lai phi kha. ¹¹Bo hai hwnwi sa kha, “Hikno kagwi tei khoroksa bwrwino nanai bo lupcha se. Bihikno t́wiwi bo sumsok khilai-o. ¹²Bwsaino kagwi tei khoroksa chwlano nanai bobo haino buitali se.

Jisu Chwrairokno Lamsokmani

¹³Bororok Jisuni thani bórokni chwrairokno yak beraui hamari khilai thung hwnwi tubu lai kha. Phiya bini sagrirok bororokno bórokni chwrairokno bini thani ta tubu di hwnwi sa kha. ¹⁴A wngmarokno Jisu nuk kha. Bini sagrirok chwrairokno ta phai di hwnmano bo chajak li ya. Hakhe bo bórokno hai hwnwi sa kha, “Chwrai bwsarokno ani thani rohor di. Bórokno ta kasu di, tamoni hwnma le omo t́wi chwrai bwsa hai bororokni bagwi’-no Kaitorni ha. ¹⁵Kók kubui khe ahai, nwing Kaitorni hano chwrai bwsa manwi yachakma hai khe yachakna se nangnai, wng ya khe nwing Kaitorni ha-o habwi se man glak.” ¹⁶Hakhe Jisu a chwrairokno bamwi nau bórokni saka yak beraui bórokno hamari rw kha.

Gwnang Khoroksa Jisuno Rwktharna Nai Ya Wngmani

¹⁷Jisu thánnga nai phuru, borok khoroksa khachigwi phaiwi bini bwskango yáskú sungwi khulumwi hai hwnwi śwng kha, “O

hoda kaham, thwi phlaiya langma manna bagwi ang tamo ma khlainai?”

¹⁸Jisu hai hwnwi sa kha, “Nwng tamo wngwi ano kaham hwn kha? Kaitor simi se kaham. ¹⁹Hakhe nwng bini dagimarokno sau mano: ‘Borok ta buthar di, buitali-buitala ta wng di, ta khok di, tatal ta sa di, ta phemlok di, nwma nwphano’⁹ bórom khlai di...”

²⁰A borok hai hwnwi sa kha, “Hodakra, chwrai phangsni simi’-no o dagimungrokno ang rákhogwi phai-o.”

²¹Jisu bono hamjagwi naisik kha. Hakhe bo hai hwnwi sa kha, “Nwng tei kaisa se khlaina tong si-o. Tháng di nini bebak tongmano phal bai di. A rangno bigrarokno rw di, hakhe chuknoha-o nini rang-rí khati horjak anw. Aboni ulo, ani logi phai di.”

²²Jisu bai bini rangno buino rw di hwnwi sajak kheno a borokni mwkhang sopsa somwi tháng kha. Bo buino rwnani muchungjak ya, tamoni hwnma le bo belaino gwnang. Hakhe bo kha thwijagwi aroni kutul lang kha.

²³Hakhe Jisu bini sagrirokni bwkhak naisigwi bórokno hai hwnwi sa kha, “Gwnangrok Kaitorni ha-o hapnani belaino kutuk wngnai!”

²⁴Sagrirok Jisu samano khnau uanajak kha. Phiya bo haino hai sa phi kha, “Angsarok, Kaitorni ha-o hapnani belaino kutuk!

²⁵Suchi bwlam twi mangingang hapna se lai anw ba, Kaitorni ha-o gwnangrok hapnani aswk lai glak!”

²⁶Sagrirok teibo uanajagwi khoroksa tei khoroksano “Hakhe sabo mwthangjaknai sla?” hwnwi swng lai kha.

²⁷Jisu bórokno naharwi hai hwnwi sa kha, “Bororok omono khlaiwi man ya phano Kaitor le khlaiwi mano. Bo le bebakno’-no khlaiwi mano.”

²⁸Pitor Jisuno hai hwnwi sa cha kha, “Chwng khe bebak khibi baiwi nini logi phai kha!”

⁹10:19 a Lam.20:12–20; Uainwi saphima 5:16–20 bwtangni naharjak kha.

²⁹Jisu hai hwnwi sa kha, “Ang norokno kubui kók sa-o ani bagwibo tei kothoma kahamni bagwibo nok, takhuk, bukhuk, buma, bupha, chwrai-khonai tei kheto panthor yakarnairok, ³⁰bo yakarmani sláibo sara kwbang man phinai. O hayungo bórok teibo nok, takhuk bukhuk, buma, bwsa tei kheto panthor kwbang mannai. Hakhe o manwirok bai bórok sabo sátokjaknai. Phiya phainai molo bórok molbrúm- brúmni langmani sokatbo mannai. ³¹Tabuk kuchuk beremo tongnairok ulo tola beremo klai bai anw. Tei tabuk tola beremo tongbainairok ulo kuchuk beremo sógwi bai anw.”

Jisu Bini Thwinano Tíwi Sa phimani

³²Jisu tei bini logi-o tongnairok Jerusalemni lama-o himwi tong lai-o. Bo hwn khe bodolni jotoni bwskango. Sagrirok khe belai uana laijak tei bórokni uklogo tongnairok khe belai kirima hap laijak. Jisu haino hai khorok chiknwi chonghorrokno kwrwngsa khilaiwi bórok bai simi kók sa lai kha. Bo bórokno Jerusalemo tamo wngnai abono sau khna rw kha. ³³Bo hai hwnwi sa kha, “Chwng Jerusalemo tháng lai tongo. Borokni Sajla ochai bokhorokrok bai kerong phrwngnairokni yago yapharwi rohorjaknai. Bo ma se ma butharjakna nangnai tei buini bororokni yago yapharjakna se nangnai hwnwi bórok sa lainai, ³⁴bórok bono tíwi thesra khilai lainai tei bono khúktwi musu lainai. Bórok bono chemuksa bai swpraknai tei buthar lainai. Hai phano thwimani salthamni ulo bo thangwi bachanai.”

Jakob Bai Johon Koimani

³⁵Hakhe Sebedaini sajlasong Jakob bai Johon Jisuni thani phaiwi hai hwnwi sa kha, “Hodakra, chini bagwi mungsaswk khilai di hwnwi chwng koi ja-o.”

³⁶Jisu hai hwnwi swng kha, “Norok le ano norokni bagwi tamo khilai di hwn ba?”

³⁷A sajlasong hai hwnwi sa kha, “Nwng bugra wngwi bórom

rwjak phuru chwngnobo kisa nai ja di. Khoroksano nini yagra bwkhak tei khoroksano nini yaksi bwkhak achuk rw ja di.”

³⁸Jisu hai hwnwi sa kha, “Norok tamo sanwi tong abo norok saui man ya. Ang nwnngmani khuri-o norok nwnngwi da manno ba? Ang baptisma namani haino baptismano norok naui da manno ba?”

³⁹“T’n, chwnng mano” hwnwi a sajlasing sa kha.

Jisu a sajlasingno hai hwnwi sa kha, “Omo sóino, ang nwnngmani khuri-o norok nw le nwnng anw tei ang namani baptisma hai baptisma norokbo na le na anw. ⁴⁰Phiyaba ani yaksi eba yagra bwkhak sabo achuknai abo ani sajaknai ya. Kaitor bo chongmani borokni bagwi se abono tiyar khilai tono.”

⁴¹Tei khorokchi sagrirok o kókno khna khe, bórok Jakob bai Johonno jolijak kha. ⁴²Jisu bebak sagrirokno kwrwngsa khe ringhor baiwi hai hwnwi sa kha, “Judai bosongo klai ya bororoknibo bugrarok tongo. Norok saui mano, a bugrarok bororokno bórokni phanno phunuknani’-no hamjago. Tei bórokni bokhorokbo bororokno kók khna rwui tonna nai-o. ⁴³Phiya norokni hwn khe abo hai ya. Norokni bokhorok wngna muchungnai borok bo seleng se ma wngnai. ⁴⁴Norokni bere kotor wngna muchungnai borok bo norokni seleng ma khatinai. ⁴⁵Ano nai di: Borokni Sajla bororok bai naijaknani nukjaknani phai ya, bororokno nainani nuknani tei borok kwbangmano mwthangna bagwi bini langma rwna se phai-o.”

Jisu Phula Khoroksano Nuk Rwmani

⁴⁶Hakhe bórok Jeriko kamiyungo sók phai kha. Jisu bini sagrirok bai aroni kutulwi tháng phuru, borok kwbangma bórok bai tháng kha. Bartimai hwnwi phula khoroksa (Timaini sajla hwnma se) lama gana-o achukjak. Bo salbrúm-brúmno rang puisarok bírwi tongo. ⁴⁷Bo Najaretni Jisu himwi thángo hwnwi khna kha. Hakhe bo hai hwnwi chirikhokna cheng kha, “O Jisu, Daudni Sajla, ano chuba ja di!”

⁴⁸Bororok kwbangmano a phulano chajak ya wngwi siring siring wng di hwnwi hwn lai kha. Phiyaba bo teibo se “O Jisu, Daudni sajla, ano chuba ja di!” hwnwi chirikhogwi tong si-o.

⁴⁹Jisu bathagwi hai hwnwi sa kha, “Bono oro phai di hwnwi sa di.”

Hakhe bórok a phulano ringwi hai hwnwi sa kha, “Nwng tabuk le tongthok si di. Bacha si di! Jisu nono ringo.” ⁵⁰A phulasa logi logi'-no bacha kha. Bo bini kamchwlwi arono yakarwi klangwi Jisuni thani tháng kha.

⁵¹Jisu bono ahai hwnwi swng kha, “Nwng ano, nini bagwi tamo khilai di hwn?”

Bo hai hwnwi sa kha, “Hodakra, ang nuk phina muchungo.”

⁵²“Tháng si di. Nwng poito khilaima bai ham rwjak kha” hwnwi Jisu sama logi logi'-no a borok nuk phi kha. Hakhe bo Jisuno lama twi rwktharwi tháng kha.

Jisu Bugra Hai Khe Jerusalemo Hap Phaimani

11 ¹Jisu bai bini sagrirok Jerusalem gana-o sók phai lai kha. Bórok Tháistwi hathaini Betphagi bai Bethania kamiyungo sók phai lai kha. Jisu bini sagrirokno mungsaswk khilai di hwnwi aro rohor kha. ²Bo bórokno hai hwnwi sa kha, “Norok nuhurmani u kamiyungo tháng di. Norok aro sógwi khe khoroksa bai phano kasajak ya kho abo twi korai petua masa nugwi anw. Abono khengwi ani thani tubu di. ³Khoroksa swk norokno tamo wngwi a korai petuano tlang hwnwi swng khe, ‘Subrai abono nangjago’ hwnwi bórokno sa di. Bo abono daktino kiphilwi rohor anw.’ ”

⁴Sagrirok kamiyungo tháng lai kha. Bórok lama-o nok duglam gana-o korai petua masa khajak nugwi kha tei abono bórok kheng lai kha. ⁵Aro bacha lajjak khoroknwi khoroktham bororok abono nuk kha. Bórok hai hwnwi swng kha, “Norok aro tamo khilai lai sla? Tamo wngwi norok a korai petuano kheng lai?” ⁶Jisu saui rohorma hai kheno a sagrirok sa kha, tei a bororok bórokno a korai petuano tlang di hwnwi rwi rohor kha.

⁷Sagrirok Jisuni thani a korai petuano tubu lai kha. Bórok aboni saka-o bórokni kamchwlwirok phinwi rw lai kha, hakhe Jisu aboni saka-o achuk kha. ⁸Borok kwbangmano lama-o bórokni kamchwlwirokno Jisuni bagwi boui rw lai kha. Baksa ba charani buphang bedekrokno tanwi lama-o boui rw lai kha. ⁹Bórokni bisingo baksa Jisuni bwskang bwskang tei baksa khe uklok uklok himwi tháng lai kha. Jotono hai hwnwi chirikhok laijak,

“ ‘Bono Lob di!’

‘Lamsok di!’ Subraini mungwi phainaisano Kaitor hamari
rw thung!’

Lobmung 118:25–26

¹⁰ “Kaitor chini Apha Daudni hano Hamari khilai thung.
A ha phaiwi tongo!
Chuknohani Kaitor lobjak thung!”

¹¹Jisu Jerusalemo habwi Noktharo tháng kha. Bo nokthar bisingni bebagono naisik kha, phiya lerwi thángma bai bo bini sagri chiknwirok bai Bethania-o kiphil tháng lai kha.

Jisu Khwichang Buphang Thwi Anw Hwnwi Samani

¹²Teini salo, Jisu Bethania yakarwi tháng phuru ok khuijak kha. ¹³Bo khwichang buphang phangsa bwlai jaksarsajak nuk kha. Hakhe bo khwichang bwthai da thái hwnwi buphang thángwi naiwi kha. Phiyaba bo buphang khwichang bwthai manwi li ya. Buphang bwlai simi se nugwi si-o tamoni hwn ma le aphuru khwichang tháinani jora ya. ¹⁴Hakhe Jisu a khwichang buphangno hai hwnwi sa kha, “Bororok nini aroni bwthairokno tei ma chá glak.” Bini sagrirok omo hai kórokno bono sama khna kha.

Jisu Noktharo Thángmani

¹⁵Jisu Jerusalemo thángwi Noktharo habwi kha. Bo aro manwi painai tei phalnai bororokno rwxhlaiwi rohor bai kha. Bo

podre pod rang swlainairokni tebulrokno tei pharuk phalnairokni tulrokno philwi rw bai kha. ¹⁶Bo khoroksano phano Nokthar t'wi mungsa manwirok tlangwi th'angna rw li ya. ¹⁷Hakhe Jisu bororokno phrwngna cheng kha tei hai hwnwi sa kha, "Elembago omo swijak tongo, 'Ani Nokthar bebak dophani borokni surijaknai nok hwnjaknai.' Phiyaba norok le omono 'sikhok bothop' se swnam si-o"

¹⁸Ochai bokhorokrok bai kerong phrwngnairok Jisu samano khna khe, bórok bono butharnani lama naituk lai kha. Aswk bororok bini phrwngmano uanajakma bai bórok bono kirijak kha. ¹⁹A horono Jisu bai bini sagrirok a kamiyungni kutul lang kha.

Jisu Poitoni Phanno Phunukmani

²⁰Teini phungo Jisu bini sagrirok bai himwi th'ang lai phuru, bo salsa swkang samani a khwichang buphangno bórok nugwi kha. A buphang kórósau thwiwi th'ang kha, yarwng suda ransau thwiwi th'ang kha. ²¹Pitor a buphangno muito manjagwi Jisuno hai hwnwi sa kha, "Hodakra, naisik di! Miya, n'wng u khwichang buphangno thwi di hwnwi samani, abo tabuk kórósau thwi th'ang kha!"

²²Jisu hai hwnwi sa kha, "Kaitorno poito khilai di. ²³Kók kubui hwn khe, norok u hathainobo 'Th'ang di, twijlango klai di' hwnwi sau mano. Tei nini bwkha-o udru-mudru wng yau norok sama haino wngnai hwnwi poito khilai khe, hakhe Kaitor norokni bagwi abo haino khlainai. ²⁴Hakhe ang o kók sa-o surima bai norok naimano mungsa swk san di. Tei norok abono man kha hwnwi poito khilai khe abórok norokno rwjaknai. ²⁵Nwng suriui tong phuru mungsaswkno t'wiwi khoroksaswkno jolimano muito man khe, a borokno nakarwi rw di. Chuknohani norokni Apha norokni sumsokno nakarma hai keno norokbo bórokno nakar di. ²⁶¹⁰

¹⁰**11:26** Swkangni Grik bijabo 26 bwtang sitokjak kha: "Phiya tumung n'wng buino nakar ya hwn khe, hakhe chuknohani nini Aphabo nini sumsokno nakar glak."

Judai T́wiphangrok Jisuni Phanno Poito Chaya Wngmani

²⁷Jisu bai bini sagrirok haino hai Jerusalemo th́ang lai phi kha. Jisu Noktharo himwi tong phuru ochai bokhorok, kerong phrwngnairok, Judai t́wiphang bokhorok kwchamrok bini thani phai lai kha. ²⁸B́orok hai hwnwi sa kha, “Chwngno sa di! nwing bu phan bai omo t́wirokno khlai? Nono a phan sabo rw kha?”

²⁹Jisu hai hwnwi sa kha, “Ang norokno kaisa swng anw. Norok abono sa di. Hakhe angbo saboni phan bai ab́orokno khlai kha sa anw. ³⁰Ano sa di: Johon bororokno baptisma rw phuru, bini phan tamo Kaitorni aroni da phai, eba borokni aroni?”

³¹O Judai t́wiphangrok Jisu swngmani ḱokno t́wiwi sa lai kha. B́orok kiching b́orok hai hwnwi sa lai kha, “Johonni baptisma Kaitorni aroni hwnwi chwng sa khebo, tamo wngwi norok Jhonno poito kh lai ya sla? Hwnwi bo chwngno hwnnai. ³²Phiya Johon baptisma rwmani phan khoroksaswkni aroni hwnwi bo chwng saui man ya.” (O t́wiphangrok bororokno kirijago tamoni hwnma le bororok Jhonno diyari hwnwi poito kh lai-o.)

³³Hakhe a t́wiphangrok Jisuno hai hwnwi sa kha, “Chwng saui man ya.”

Jisu hai hwnwi sa kha, “Hakhe o samungrok kh lainani phan sabo ano rw kha angbo norokno sa ya.”

Kaitor Bini Sajlano Rohormani

12 ¹Jisu rwnghthoma bai khe bororokno phrwngo. Bo hai hwnwi sa kha, “Borok khoroksa angur ḱaimani. Bo angur bari bera dum bai kha tei angur sepna bagwi holongdabo hakhor khur kha. Hakhe bo garing khungsa tang kha. Bo a angur barino munirokni yago klangwi beraina th́ang kha.

²“Ulo, angur khaknani jora śok phai khe, bo bini banta angur nahar rwna bagwi seleng khoroksano munini thani rohor kha. ³Phiyaba munirok a selengno romwi bu laiwi yak bukcha khe rohor lai kha. ⁴Hakhe nokphang tei khoroksa selengno a munirokni thani rohor khua. B́orok bono bokhorogo buwi

lachimasingcha khilai lai kha. ⁵Hakhe nokphang tei khoroksa selengno rohor phi kha. Munirok a selengno butharwi pái lai kha. Nokphangsa kwbangma selengrokno munirokni thani rohor kha. Bórokni bisingo baksano a munirok bu kha tei baksano hwn khe butharwi pái lai kha.

⁶Nokphangni tei khoroksa susukno rohorjaknai tong si-o. Abo wng kha bini sajla. Bono bo belai hamjak phano bórokni thani rohrona hwnwi bwkha chabwi pái kha. Bo hai hwnwi uansuk kha, ‘Munirok ani sajlan le bórom khilai anw.’

⁷“Phiya munirok bórok kiching bórok hai hwnwi sa lai kha, ‘Omoba nokphangni sajla se bla, o angur baribo binino wng anw. Tumungno chwng bono buthar khe, o angur bari chini se wngnai.’ ⁸Hakhe bórok bono romwi angur barini kariui rohor kha tei bono butharwi pái lai kha.

⁹“Hakhe a angur barini bugra tamo khlaino? Bo thángxwi a munirokno butharnai. Tei angur barino buini yago yapharwi rwnai. ¹⁰Norok sóino Elembakni o kókno pori ya khu di ba:

‘Nok tangnairok samung nang ya hwnwi

Khibiui rwmani holongthai

Abono wng phai kha

Nok busupni holongthai.’

¹¹Subrai o samungno khilai kha,

Tei uanamasingcha chwng wngjak kha.’ ” *Lobmung 118:22–23*

¹²Judai twíphangrok o kókno khna khe, bórok abono bórokno se sa-o hwnwi romwi man kha. Hakhe bórok jisuno romnani lama naituk lai kha, hai phano lukurok mungsaswk da khilai langno hwnwi kirijagwi tong kha. Bórok bono yakarwi aroni kutulwi thángx lai kha.

Judai Twíphangrok Jisuno Phemlokna Naimani

¹³Ulo, Judai twíphangrok khoroknwi khoroktham pharisairok tei Herodia bodolni khoroknwi khoroktham borokno jisuni thani

rohok kha. Bórok bono cha ya sa rwui khwí-o kwcha rwna nai kha. ¹⁴Bórok Jisuni thani thángxwi hai hwnwi sa kha, “Hodakra, chwng saui mano nwngh borok kaham. Bororok nono twíwi tamo uansugwi tong abono nwngh kirijak ya. Bebak bororokno’-no nwngh baksa khe nugo. Tei Kaitorni kubui lamano nwngh phrwngo. Chwngno sa di, Sijarno teks rwmani abo cha da cha? Chwngba rwnai da rw ya?”

¹⁵Phiya Jisu a bororok bono phemlokna nai tongmano saui manwí hai hwnwi sa kha, “Norok tamo wngwi cha ya sa rwui ano khwí-o kwcha rwna nai lai? Ruphaini rang lepsa ani oro tubu di. Ano abono phunuk di.” ¹⁶“Bórok Jisuno rang lepsa rw khe, bo hai hwnwi swng kha, “O puisa-o saboni bumukhang tong? Saboni mung swijak tong?” “Oro Sijarni bumukhang tei bini mung se swijak tongo” hwnwi bórok sa kha.

¹⁷Hakhe Jisu bórokno hai hwnwi sa kha, “Sijarni manthai hwn khe Sijarno rw di tei Kaitorni manthai khe Kaitorno rw di.” Bororok Jisuni o kók khnau uanajak bai kha.

Sadukairok Jisuno Phemlokna Naimani

¹⁸Hakhe khoroknwi khoroktham Sadukairok Jisuni thani phai lai kha. (Sadukairok hwn khe kwthwirok thangwi bacha ya hwnwi poito khilai-o). Bórok bono swng lai kha: ¹⁹“Hodakra, Musi hai hwnwi swi lang kha, káijak chwla khoroksa thwi khe tei bini bwsarok kwrwi hwn khe, buphayung a bwrwino nok ma phirokthai. Hakhe bwtani bosong narwkna bagwi bórok bwsarok manna nangnai. ²⁰Salsa takhuksnirok tongmani. Jotoni okra kaijak kha phiya bwsarok wng ya sinino bo thwiwi thángx kha. ²¹Hakhe bini yakurai káro a bwrwino nok phirogwi na kha. Bobo bwsa man ya sinino thwiwi thángx kha. Tei takhuksani jorabo ahai’-no wng khua. ²²Takhuksnirok’-no a bwrwi bai káijak bai kha. Khoroksa takhuk bai phano a bwrwi bwsa man li ya. Ulo khe a bwrwibo thwiwi thángx kha. ²³Phiyaba takhuksnirok’-no a bwrwi bai káijak lai kha. Hakhe bororok kwthwini thangwi bacha phuru, bo saboni bihik wngnai?”

²⁴Jisu hai hwnwi sa kha, “Norok bwswk se cha ya gwja? Tamoni hwnma le Elembago tamo sajak tong abo norok saui se man ya. Tei norok Kaitorni phannobo mungsa si ya gwja. ²⁵Kwthwini thangwi bacha phuru tei káilaimung tong glak. Chwla bwrwi tei káijak lai glak. Joto bororokno chuknohani suarirok hai wng bainai. ²⁶Kaitor kwthwini mwthangwi tisa mano t́wiwi tamo sa kha abono norok kubui’-no pori khna. Musi satasuta khammano kaisa bijabo swi kha, aro Kaitor Musino o kók sa kha: ‘Ang Abrahamni Kaitor, Isakni Kaitor, tei Jakobni Kaitor.’” ²⁷Hakhe bórok tabukbo thwi ya kho, tamoni hwnma le bo simi se kwthang bororokni Kaitor. Norok Sadukairok belai cha ya gwja!”

Bu Dagimung Jotoni Slái Kotor

²⁸Kerong phrwngnairokni bere khoroksa Jisuni thani phai kha. Bo Jisuno Sadukairok tei Pharisairok bai tokra rw lai tongo hwnwi khna kha. Bo Jisuno kaham khe bórokni swngmungrokno uphilwi samani nuk kha. Hakhe bo bono hai hwnwi swng kha, “Bu dagimung jotoni slái kotor?”

²⁹Jisu hai hwnwi sa kha,” Jotoni slái dagimung kotor wng kha omo: ‘O Israilni bororok, khna di! Subrai’-no wng kha chini Kaitor, bo simi se Subrai. ³⁰Nini Subrai Kaitorno bwkha rwsugwi hamjak suk di.’” ³¹Tei kaisa kotor dagimung wng kha: Nwng baithangno hamjak t́wino nini nok arino hamjak di.’” O mungnwi dagimani abo belaino kotor.”

³²A borok hai hwnwi sa kha, “Hodakra, abo kók kahamno, Kaitor simi se Subrai, bono karwi tei kubun Kaitor kwrwi hwnwi nwnng samani abo sói’-no. ³³Hakhe nwnng nini Kaitorno bwkha rwsugwi hamjak suk di. Tei nwnng baithangno hamjak t́wino buinobo hamjak di. Pun-tok ratharwi Kaitorno barokmani sláibo o dagimungrok kotor kuk”.

²⁷12:26 Lam. 3:6 bwtangni naharjak kha.

²⁸12:29-30 Uainwi Saphima 6:4-5 bwtangni naharjak kha.

³³12:31 Leb 19:18 bwtangni naharjak kha.

³⁴Jisu a borokno kaham khe uansugwi kók sama nugwi hai hwnwi sa kha, “Nwng Kaitorni ha gana-o tongo.” Aboni ulo, khoroksa phano Jisuno mungsa kók swng rak li ya.

Masia Daudni Sajla Eba Khe Daudni Subrai Da?

³⁵Jisu Noktharo phrwngwi tong phuru bo hai hwnwi swng kha, “Tamoni bagwi kerong phrwngnairok Masiano Daudni sajla hwn lai? ³⁶Phola Kwtharni chubachu bai Daud baithangno hai hwnwi sa kha,

‘Subriayung Kaitor ani Subraino sa kha:

Ani gana-o yagra bwkhak achuk di,

Tei ang nini kena arirokno Nini yakung yaphango khiklai
anw.’

Lobmung 110:1

³⁷Daud baithang’-no Masiano ‘Subrai’ hwno. Hakhe bahai khe Masia Daudni sajla wngnai ba?” Bororok kwbangmano Jisuni kókno khnau khapang srangjak bai kha.

Jisu Kerong Phrwngnairokni Cha yano Samani

³⁸Jisu phrwngwi tong phuru hai hwnwi sa kha, “Kerong phrwngnairok bai hus khe tong di. Bórok buini slái juda rírok chumnano chajago. Bororok bai hati haba-o bórom rwjaknano bórok hamjago. ³⁹Bórok thumnogo buini slái bwskango achuknano hamjago tei panda-o achukthai kahamno nai-o. ⁴⁰Phiyaba bórok randijwkrokno bandiui bórokni nok-hukrokno monok bai-o. Aboni yagulo sak-sak borok kaham phunukna bagwi tángma-tángsa suri lai-o. Kaitor bórokno belai khe yagul su anw.

Yapharmung Kubui

⁴¹Jisu Noktharni rang tonjaknai japa bwskango achugwi bororok aro rang rwi ton laimano naiwi tongo. Gwnangrok kwbangmano

rangrok kwbangma aro rw lai kha. ⁴²Hakhe randijwk bigra khoroksa aro phaiwi tamani snamjak puisa lepnwi rw phai kha, abo puisa lepsani slái se kisa.

⁴³Jisu bini sagrirokno ringwi tubui hai hwnwi sa kha, “O bigrajwk bebagwi lepnwi se rw-o. Phiya kók kubui hwn khe, bo se joto gwnangrokni slái phano rw kuk si-o. ⁴⁴Bórokni kwbangmano tongo, bini bisingo se bórokni nangmani bárano se rw-o. O bwrwima le belai bigra twtúi se bini tong kwrwi chána ajimano se bebak rwui klang bai kha.”

Jisu Thinangni Bagwi Hus Khlaimani

13 ¹Jisu noktharni kutulwi tháng phuru, sagrirokni bere khoroksa bono hai hwnwi sa kha, “Hodakra, nahar di bwswk se holong kotor kotor! bwswk se dolan naithok naithok!”

²Jisu hai hwnwi sa kha, “norok aswk dolan kotor kotor nu da nuk? Abórok bebakno swbai khibijak bainai. Bebak holongno ha-o búring khe khiklajak bainai. Aboni holong dulsa phano tei dulsani saka-o tong glak.

³Aboni ulo, Jisu Thaistwi Hathaini kwrwngsa-o achugwi tongwi kha. Aro bini logi Pitor, Jakob, Johon tei Andria tongo. Bórok aroni simi noktharno naharwi, Jisuno sereksa khe hai hwnwi swng kha, ⁴“Chwngno sa di, omorok buphuru wng phainai? Tei omorok wngna phuru chwngno tamorok phunukjaknai?”

⁵Jisu bórokno hai hwnwi sa kha, “Hus wng di! Khoroksa bai phano ta bandijak di. ⁶Borok kwbangmano phaiwi ani mung nau, ‘Ang’-no Masia’ hwnwi saui bororokno bandinai. ⁷Norok choba nangmani khorangrok tei kubun chobarok chengmani kothomarok khnanai. Pliyaba ta kiri di. Mol paina swkang omo hairok wngnai’-no. ⁸Dopha bai dopha choba nang lai anw. Ha bai ha choba nang lai anw. Omo hai jorabo phai anw bororokni bagwi chánani chámung tong glak. Tei kwrwngsa kwrwngsa-o bangla phai anw. Omo hai birmanrok bwrwirok sak kengna phuru bohok sajakgrama hai se wngnai.

⁹“Norok hus ma wngnai! Ani sagri wngma bagwi norokno bororok rom anw tei buj thumna bagwi tlang anw. Norok bórok bai bórokni thumnokrogo bujak anw. Norok bubagrarok bai gobornorrokni bwskango bacha rwjak anw tei ani kókno bórokno ma sa anw. ¹⁰Mol páina swkang, bebek dophani thani kothoma kaham ma pírvak granai. ¹¹Norok romjagwi amjokjagwi tong phuru-obo, tamono sanai hwnwi ta uana di. Aphuru Kaitor norokno sa di hwnma haino norok sa di. Norok samani kók abo norok sa glak. Abo Phola Kwthar se sanai.

¹²“Takhuk bini takhukni kena ari wngwi butharna bagwi rom rwui rohor anw. Bupharokbo bwsarokno butharna bagwi rom rwui rohor anw. Bwsarok buma buphani kena ari wngwi bacha anw tei buthar lai anw. ¹³Ani sagri wngma bagwi bebek bororokno norokno naisler anw. Tamo khe páithak jora poito-o kwrak khe tongnai borok se mwthangjaknai.

¹⁴“Norok ‘sokomor rwnai a kirimasingcha manwino nuk anw.’ Norok o manwino bo tongna klai ya jaga-o bachajak nuk anw.” (Omo tamo hwnmani abo porinaisa saui mano hwnwi ang poito khilai-o.) “Judiani bebek bororok a jora-o hathai bwkhak khárwi thánga nangnai. ¹⁵Bórok mungsaswkno mwthakna bagwi jorano ereng rohor yai khárwi thánga nangnai. Tumung khoroksa swk bórokni nokni núkhúngo tong khe, bórok nok bisingni manwi naharna hwnwi tola-o ta tháng thung. ¹⁶Tumung khoroksa swk kheto-o tong khe, rí naharna hwnwi kiphilwi ta tháng si thung.

¹⁷Aphuruni a jora-o sakderiya eba bwsa kwlwi gwnang bwrwirok bwswk se birman nangjano. ¹⁸Masingo omorok ta wng ja thung hwnwi suri san di, ¹⁹tamoni hwn khe a salrok tekto bai máng kupulung wngnai. Kaitor yaphango hayungno snam phuruni simi tekto manwí phaimani slái-bo aphuruni a tekto teibo se kwbang wngnai. Tei abo hai hamya mungsabo wng phi glak. ²⁰Phiyaba Subrai a kirimasingcha salrokno bara rwna hwnwi chong kha, tumung abono bara khilai ya khe, khoroksa

phano kwthang tong glak. Phiyaba Subrai bini chongjak bororokno chubana bagwi a salrokno bara snamna.

²¹“Aphuru-o norokno khoroksa swk sa anw, ‘Nahar di, aro se Masia!’ Eba tei kubun borok, ‘Aro se Bo!’ hwnwi sa anw, phiya bórokno poito ta khilai di. ²²Masia tatalrok bai diyari tatalrok phai anw tei soidom bai uanamasingcha samungrok khilai anw, tumungno man khe, Kaitorni chongjak bororokno suda bandina nai anw. ²³Aboni bagwi hus wng di. Tabuk omorok bebak wng phaina swkangno ang norokno hus khilai rw-o.

Borokni Sajla, Jisu, Tei Uaisa Phai phuru Khe

²⁴“Aphuruni a tekto manwi tongma salni jorarogo,
‘Sal mwnagwi tháng anw,
tal tei chwng glak.

²⁵ Nokhani athukirok klai anw,
Tei nokhani bebakno swlajak bai anw.’

²⁶“Aphuru khe Borokni Sajlano chumui-o phan kwrak bai chwngsacha khe phaimano bororok nuk anw. ²⁷Bo bini suarirokno hayung gwnangwi rohor anw. Bórok bini chongjak bororokno hayungni bebak bwkhakni thumsa khilai anw.

²⁸“Khwichang buphang chwngno kaisa phrwngmung rw-o: khwichang buphangni bedekrok khwrangsau kwlwi wngwi phai phuru, tei bwlairok kwatla khe rotomsau phai phuru, aphuru khe tungblang belai sampa kha hwnwi norok saui mano. ²⁹Omo hai kheno, omorok bebak wngwi tongmarokno norok nuk khe, a jora⁷⁴ belai sampa kha hwnwi tei sók phai se tong kha hwnwi, norok saui man anw. ³⁰Ang norokno sóino sa-o omorok bebak’-no o molni baksa bororok kwthang tongsani’-no wng phainai. ³¹O bebak hayung, ha bai nokha se,

⁷⁴ **13:29 Jora** Jisu jorano twi kók samani khe mungsa swk nangukma wng phainaino twiwi. Lk 21:31 bwtangno nai di. Jisu sama khe, aphuruni a jorano wng kha Kaitorni ha phainani jora.

kwmai tháng anw ba, phiyaba ani kókrok molbrúm-brúm'-no tong phlainai.

³²“A sal eba jora buphuru phaino khoroksa phano saui man ya. Chuknohani Sajla bai suarirokbo a sal eba jora buphuru phaino saui man ya. Apha simi se saui mano. ³³Hus wng di! Tiyar wng phlai tong di. A jora buphuru phaino norok saui man ya.

³⁴“Omo borok khoroksa bini nokno selengrokno mwrwkna klangwi beraina thángma hai. Bo bini selengrokno janija samung khilai di hwnwi berwi klang kha. Bo duglam mwrwkna selengno khe tiyar wngwi tong di hwnwi saui klang kha. Tei ang tabuk norokno omono'-no saui tongo. ³⁵Norok tiyar wngwi máng tongna nangnai. Norok saui man ya nokphang buphuru kiphilwi phaino. Bo sarik jora-o phano phaiwi mano, eba hor kuthugo, eba phung aichugo, eba sal kasa phuru phano phaiwi mano. ³⁶Tumung nwng tiyar wngwi máng tong khe, bo phainai hwnwi tongma jorani swkang phai phano, nono thujak nuk phai glak. ³⁷Ang omono norokno, tei jotono'-no sa-o: “Tiyar wngwi tong di!””

Jisuno Butharna Bagwi Judai Twi phangrok Kók Chap Iaimani

14 ¹Yókma Ter bai Auang Bángla Ter nokha salnwi se tong si-o. Ochai okrarok tei kerong phrwngnairok bororokno phunuk yai Jisuno romna bagwi lama tei bono butharna lama rutugwi tongo. ²Bórok hai hwnwi sa lai kha, “Tamo khe chwng Jisuno o terni bisingo le rom ya. Bororok jolijagwi ur pati thung abo chwng nai ya.”

Bwrwima Khoroksa Samung Kaham Khilaimani

³Jisu Bethania-o biyadi chájak Simonni nogo tongmani. Bo aro cháui tong phuru, bwrwima khoroksa bini aro phai kha. Bini aro holong kuphurni sisi-o khe nard kahamni swnamjak belai morokma thok motom kupulung tháisa tongo. Bo a sisino

khulugwi a thok motomno Jisuni bokhorogo lu-ui rw kha.

⁴Aro sagrirokni bere baksa omono nuk kha. Bórok chajak ya wngwi khoroksa tei khoroksano hai hwnwi sa lai kha, “A thok motomno tamoni haino khibi lang? ⁵Omo bisisa samung tangwi ajimani bai baksa. Omono phalwi man kha mun tei a rangrokno bigrarokno rwui man kha mun.” Hakhe bórok a bwrwimano belai samung cha ya khilai kha hwnwi hwn lai kha.

⁶Jisu hai hwnwi sa kha, “Bono saichung yakarwi klang di. Norok tamo wngwi bono aswk tekto rw lai tong? Bo ani bagwi belai samung kahamno khilai kha. ⁷Bigrarok norok bai mángno tong anw bla, tei norok muchung phuruno bórokno chubau manano. Phiya ang le norok bai máng tong glak. ⁸O bwrwima bo khilai manmani jora t́wino ani bagwi khilai kha. Ang thwina swkang’-no ano phopna bagwi bo ani bwsago thok motom lu-ui tiyar khilai kha. ⁹Hayung gwnangwi bebak bororokni thani Kothoma kaham sajaknai. Tei ang norokno sóino sa-o hayung gwnangwi Kothoma kaham sajak thani, o bwrwima tamo khilai kha abobo sajaknai, tei bororok bono muinto khlainai.”

Judas Jisuni Kena Arirokno Chubana Gosimani

¹⁰Aphuru Judas Iskariot, sagri khorokchiknwirokni bere khoroksa, Jisuno rom rwui bórokno yapharwi rohorna bagwi ochai bokhorokrok bai kók sana tháng kha. ¹¹Bórok omono t́wiwi belai tongthok lajak, tei bórok bono rang rwna hwnwi kók rw kha. Aboni bagwi bo Jisuno rom rwui bórokni thani yapharwi rohorna bagwi jora kaham naisingwi tong kha.

Yókma Terni Chámung

¹²Omo tabuk Auang Bángla Terni puilani sal – Yókma terni bagwi o salo mera bwsarok ratharjakma sal. Jisuni sagrirok bini thani phaiwi hai hwnwi śwng kha, “Yókma tero nwnng chána bagwi chwnng thángwi bebakno tiyar khilai sók anw. Nwnng khe chwnngno buro le chá di hwnba?”

¹³Jisu bini sagrirokni bere khoroknwino kamiyung koto rohor kha. Bo bórokno hai hwnwi sa kha, “kamiyung koto tháng di. Norok borok khoroksano twi gola tháisa twíjak nugwi anw. Bo norokni thani phai anw. Bono rwkthar di. ¹⁴Bo nok khungsa-o thángnai. A nokni nokphangno hai hwnwi sa di, ‘Hodakra, bo tei bini sagrirok bu khotolo Yókma Terni chámung chánai abono nwnng chwnngno phunugwi rw di hwnwi saui rohor.’ ¹⁵A nokphang sakani khotol kotorma kaisa chini bagwi tiyar khelaijak norokno phunugwi rw anw. Aro’-no chini bagwi chámung tiyar khelai sók di.”

¹⁶Hakhe a sagrirok kutulwi kamiyungo tháng lai kha. Jisu samani haino bebakno wng kha. Hakhe a sagrirok Yókma Terni chámung tiyar khelai lai kha.

¹⁷Sanja wng kheno Jisu chonghor khorok chiknwirok bai a nogo tháng kha. ¹⁸Bórok jotono tebulo chá lai tong phuru, bo hai hwnwi sa kha, “Norokni bere khoroksa ano ani kena arirokni yago yapharwi rohor anw hwnwi ang samano poito khelai di – norokni bere’-no khoroksa tabuk ang bai baksa cháui tongo.”

¹⁹A sagrirok omono khnau belai bwkha hamya wngjak lai kha. Khoroksa khoroksa khe Jisuno hai hwnwi sa lai kha, “Sóino abo le ang ya na bla!”

²⁰Jisu hai hwnwi sa kha, “A khoroksa norok khorokchiknwirokni bere’-no, bo ang bai baksa kaisa mairango bini ruti chom saui tongnai. ²¹Elembago Borokni Sajla sátokjaknai hwnwi sajakma haino bini thani nang phainai. Phiyaba Borokni Sajlano butharna bagwi romwi rohornai a borokni belai hamya wngnai. Bo achai ya kheno bini bagwi kaham wng kuk kha mun.”

Subraini Panda

²²Bórok chá lai tong phuru, Jisu auang lepsa nau aboni bagwi Kaitorno hambai rw kha. Bo abono swkagwi, bini sagrirokno rw kha tei hai hwnwi sa kha, “O auangno na di tei chá di. Omo ani bahan.”

²³Aboni ulo bo angur bwtwini khuri nau, aboni bagwi Kaitorno hambai rw kha, tei abono bórokno yapharwi rw kha. Bórok jotono a khurino nwnng lai kha. ²⁴Hakhe bo hai hwnwi sa kha, “O angur bwtwi wng kha ani thwí, Kaitor bai bini bororokno kwtaI khe swmai tangna bagwi borok kwbangmani banta lukhlaijaknai. ²⁵Ang norokno saui man rwna muchungo, Kaitorni ha-o angur bwtwi kwtaI no nwnng ya sak jora ang tei o angur bwtwino nwnng phi glak.”

²⁶Bórok jotono rwchapmung tangsa rwchap lai kha tei Thaistwi Hathai-o tháng lai kha.

Sagrirok Bono Khibiui Thángnai Hwnwi Jisu Samani

²⁷Hakhe Jisu sagrirokno hai hwnwi sa kha, “Norok jotono norokni poito yakar anw. Elembago hai hwnwi sa-o,

‘Ang mera mwrwknaino butharnai,
Tei merarok khárwi tháng bainai.’

Sakaria 13:7

²⁸Phiya ang butharjakmani yagulo, ang kwthwini thangwi bacha phinai. Hakhe ang Galili-o thángnai. Aro-o norok phaina swkangno ang tongnai.”

²⁹Pitor hai hwnwi sa kha, “Tei kubun sagrirok se bórokni poito yakar anw ba, phiya ani poito le ninang phlai glak!”

³⁰Jisu hai hwnwi sa kha, “Tini horo’-no nwnng ano sini ya hwnwi kubuino sanai. Togla uainwi kochikna swkangno nwnng omono uaitham sa anw.”

³¹Phiya Pitor kwraI khe sa kha, “Ang nwnng bai baksa thwiwi suda se mano hai phano nono sini ya hwnwi sa glak!” Tei joto sagrirokbo abo haino sa lai kha.

Jisu Saichung Suri Sanmani.

³²Jisu bai bini sagrirok Getsimani hwnwi kwrwng sa-o thang lai kha. Bo bórokno hai hwnwi sa kha, ‘Ang suri sanwi tongsak norok

oro achugwi tong lai di. ³³Phiya bo Pitor, Jakob, Johonno bini logi phai di hwnwi sa kha. Bo belai khe khabo khakhamjak kha tei amang-chimangbo wng kha, ³⁴tei bo bórokno hai hwnwi sa kha, “Khakhamma bai ani bwkha belai hilik laha, ang thwina naima hai se ma tong kha. Orono naisingwi tei sichau tong lai di.”

³⁵Jisu bórokni tei kisa hakchalo thángxwi, ha-o klaiwi hai hwnwi suri san kha. Tumung man khe o sátokjaknani jorano bo ta manjak thung hwnwi suri san kha. ³⁶Bo hai hwnwi sa kha, o Apha, ³⁵o Apha! Nwng bebakno'-no khilaiwi mano. Ano o khurino ³⁶ta khan rw ja di. Phiya ani muchung twí ya, nini muchung twí se khilai ja di.”

³⁷Aboni ulo bo kiphilwi bini sagrirokni thani thángx kha tei bórokno thujak nugwi kha. Bo Pitorno hai hwnwi sa kha, “Simon, nwng tangwi mwktrwi thángxwi tong? Nwng ang bai baksa damsani bagwi phano sichau tongwi man li ya di ba? ³⁸Sichau tong di tei belokjak ya twí khe suri sanwi tong di. Nini phola le kahamno khlaina muchungjago, tamo khe nini bwsak se kebel.”

³⁹Jisu tei uaisa thángxwi a kók'-no kók saui suri sanwi kha. ⁴⁰Hakhe bo kiphilwi bini sagrirokni thani thángx phi kha tei haino hai bórokno mwktrwi thángxjak nugwi kha. Bórok sichau tongwi man li ya. Bórok bono tamo hwnwi sanai saui man li ya.

⁴¹Jisu omo bai khe uaitham suri san baiwi, bo bini sagrirokni thani kiphilwi thángx kha. Bo bórokno hai hwnwi sa kha, “Norok tabuk phano mwktrwi thángxwi lenglauri tong kho hai da? Belai se wng kha! Borokni Sajla sumsok gwnang bororokni yago yapharwi rohorjakna jora sók phai kha. ⁴²Bacha di! Chwng thángxna nangnai. Ano romwi bórokni yago yapharwi rohorna borok phaiwi sók phai kha.

³⁵**14:36 Apha (Abba)** Judani chwrairok Arami kók bai bórokni buphasongno ringmani.

³⁶**14:36 khurino** Tekto manmani mari. Jisu khuri namani abo wng kha bwsakangni kirimasingcha tektono yachakmani se.

Jisu Romjakmani

⁴³Jisu kók saui tong phuruno Judas, aro sók phai kha, sagri khorokchiknwini bere bobo khoroksa. Bini logi-o borok kwbangma, bebakno seng bai tokphung twí laijak. Bórok ochai bokhorokrok, kerong phrwngnairok, tei Judaini okra chakrarak bai rohorjakmani.

⁴⁴Judas mungsaswk khilaiwi Jisu bubo hwnwi bórokno phunukna bagwi khá chapjak. Bo hai hwnwi sa kha, “Ang motom sumani abono Jisu wngnai. Bono romwi norok tlang phuru jai khe naiwi tlang di. ⁴⁵Abo hai kheno Judas Jisuni gana-o thángwi “Hodakra” hwnwi sa kha. Hakhe bo bono motom su kha. ⁴⁶A bororok Jisuno rom kha tei bono kha lai kha. ⁴⁷Aro Jisuni gana bachau tongnai sagrirokni bere khoroksa achomsa seng romwi sotroui tikhlai kha. Bo abono yago nauí ochai bokhorokni selengni khunju tankhlai rw kha.

⁴⁸Jisu Aphuru hai hwnwi sa kha, “Norok tamoni bagwi sengrok bai tokphungrok bai ano aswk majra gwnang hai khe romna phai lai lang? ⁴⁹Angba salbrúmno Noktharo phrwng twítwí norok bai mángno bla. Norok ano aro-o rom li ya. Phiya Elembakni kók sajakmarok nang phaimano phunukna bagwi se omorok bebak wngo. ⁵⁰Aphuru Jisuni bebak sagrirok bono khibiui khárwi tháng bai kha.

⁵¹Jisuni logi-o tongnairokni bere khoroksa sikla ritrak simi chumjak. Bororok bono romna nai lai phuru khe, ⁵²bo bini ríno bórokni yago khibiui saklanga khe khár lang kha.

Judai Twíphangrokni Bwskango Jisu

⁵³Jisuno romnairok bono ochai bokhorokni nogo tlang lai kha. Joto ochai bokhorokrok, Judaini okra chakrarak, tei kerong phrwngnairok aro-o kuthum lai kha. ⁵⁴Pitor Jisuno hakchalo tong tw twí rwkthar te rwkthar te ochai bokhorokni nokhla jora rwkthar kha. Bo a nokhla-o thángwi sengkrakrok bai baksa achugwi hór tongwi tong kha.

⁵⁵Ochai bokhorokrok tei bebak kaunsilni bokhorokrok Jisuno

butharwi manna bagwi bo mungsaswk chaya da khelai kha abono rutuk lai kha. Phiyaba kaunsilni bororok Jisuno butharwi mannai abo t'wi mungsa majrabo phunugwi man li ya. ⁵⁶Borok kwbangma'-no phaiwi Jisuni bagwi tatal kók sa lai phai kha, phiyaba bórok bebakno juda juda kók sa lai kha. Bórok samani bere khoroksa samani phano gosiui najak li ya.

⁵⁷Hakhe tei kubunrokbo bacha lai kha tei Jisuni bagwi teibo tatal sa lai kha. Bórok hai hwnwi sa lai kha, ⁵⁸“Chwng o borokno hai hwnwi samano khna kha, ‘Bororokni yak bai tisajak o noktharno ang swbai khibinai. Tei salthamni yagulo ang tei khungsa nokthar tisanai abo bororokni yak bai swnamjak ya.’”

⁵⁹Phiya o bororok samanobo gosiui najak li ya.

⁶⁰Hakhe ochai bokhorok jotoni bwskango bacha kha tei Jisuno hai hwnwi sa kha, “O bororok nini bagwi kwbangma'-no sa lai kha. Bórok nono majra bermano t'wiwi nini mungsa swk sajaknai da tong? Bórok kubui da sa lai?” ⁶¹Phiyaba Jisu bono mungsa phano kók phirogwi sa li ya.

Ochai bokhorok Jisuno tei tháisa hai hwnwi swng kha: Nwng a Masia, hamari manjak Kaitorni Sajla da?

⁶²Jisu hai hwnwi sa kha, “Au, Angno Kaitorni Sajla. Tei thinango Borokni Sajlano phan gwnang Kaitorni yagra bwkhak achukjak khe norok nuknai. Tei Borokni Sajlano chumui-o khe chuknohani phaimani nuk anw.

⁶³Ochai bokhorok omono khna kheno jolijagwi bini sakni rírokno chirwi khibiui hai hwnwi sa kha, “Chwng tei sakkirok nang li ya! ⁶⁴Kaitorno hamya samano norok khna bai kha. Norok tamo hwn bai?”

Jotono Jisuno majra gwnang tei butharjakna nang sinai hwnwi gosi lai kha. ⁶⁵Bórokni bere baksa borok bono aro khúktwi musu lai kha. Bórok bini mokol khapungwi bórokni yamsung rw lai kha. Bórok hai hwnwi sa lai kha, “Diyari hai khe chwngno sa la, nono sabo bu!” Hakhe sengkrakrok Jisuno aroni tlang tháng kha tei swprak lai kha.

Pitor Jisuno Sini-o Hwnwi Gosina Kirijakmani

⁶⁶Pitor nokhla'-ono tongwi tong phuru, ochai bokhorokni selengjwk khoroksa aro phai kha. ⁶⁷Bo bono hór tongwi tongma nuk kha. Bo bono kaham khe naharwi hai hwnwi sa kha, Nwngbo Nasaretni a borok, Jisuni logini'-no."

⁶⁸Phiya Pitor abono kubui ya hwnwi saui, "nwngba ailangkuilang se sa bla" hwnwi hwn kha. "Nwng tamo sa trwngwi tong kha ang si li ya" hwnwi bo sa kha. Hakhe bo aroni kutulwi nokhla haplamo tháng khe togla kochigwi rw kha."

⁶⁹Selengjwk bono aro-o nuk phirwi, aro bachai tongnai bororokno bo haino hai sa phi kha, "Bórokni bere o borokbo khoroksa." ⁷⁰Pitor haino hai abono kubui ya hwnwi sa phi kha.

Swrapsa tongwi, aro bachai tongnai bororok hai hwnwi sa lai kha, "Chwng saui mano nwngbo bórokni bere khoroksa, tamoni hwn khe nwngbo Galilini borokno."

⁷¹Hakhe Pitor bórokno swraiwi hai hwnwi sa kha, "Ang Kaitorno swmai tangwi sa-o, Norok saui tongmani o borokno ang sini ya!"

⁷²Pitor omono sa bai kheno, Togla tei uaisa haino hai kochigwi rw kha. Hakhe "Togla uainwi kochikna swkang, nwng ano sini ya hwnwi uaitham sa anw" hwnwi Jisu bono samano bo muito manjak kha. Hakhe Pitor kapna cheng kha.

Jisuno Gobornor Pilat S'wngphnekmani

15 ¹Phung aisirisiri, ochai okrarok, Judaini okra chakrarok, kerong phrwngnairok tei bebak kaunsilni kuchugo tongnairok Jisuno tamo khlainai hwnwi kók chap laijak. Bórok bono khau, sopreui tlang kha tei gobornor Pilatni aro yapharwi rwi kha.

²Pilat Jisuno hai hwnwi s'wng kha, "Nwng Judairokni bubagra da?"

¹⁷14:68 Grikni baksa bijabo "togla kochik kha" hwnwi saui ma kwrwi.

Jisu hai hwnwi sa kha, “T’n, abo sóino.”

³Ochai okrarok Jisuno kwbangma’-no majra ber lai kha. ⁴Hakhe Pilat Jisuno haino hai tei uaisa hai hwnwi swng phi kha, “O bororok nono kwbangma kók twi majra bermano nwnng nugwi tongo. Nini mungsa phano sana kwrwi da?”

⁵Hai phano Jisu mungsa phano sa li ya, tei abo Pilatno belai kheno uana rw kha.

Pilat Jisuno Phiyókna Bagwi Chaitok Phano Man liya.

⁶Bisi brúm-brúm Yókma tero gobornor bororok naimani borok khoroksano alongni phiyók phiyógo. ⁷Aphuru Barnanba hwnwi borok khoroksa alongo chobjak tongo. Ur pati phuru borok buthar laima bagwi bo tei bini logini kebengnairok alongo chobjak tongo.

⁸Bororok Pilatni aro phaiwi alongo chobjak khoroksano phiyók phiyókma hai khilai di hwnwi san lai phai kha. ⁹Pilat bórokno hai hwnwi swng kha, “Judairokni bubagrano da norok ano phiyók di hwn?” ¹⁰Músúmani bai se ochai okrarok Jisuno bini thani yapharwi rohor hwnwi Pilat saui mano. ¹¹Phiyaba ochai okrarok bororokno tóksa rwui Barnabano se phiyók di, Jisuno ya hwnwi Pilatno san rw lai kha.

¹²Pilat haino hai bororokno hai hwnwi swng phi kha, “Hakhe Judairokni bubagra hwnwi norok ringmani o borokno ano tamo khilai di hwn?”

¹³Bororok, “Bono kruso buthar di!” hwnwi chirikhok lai kha.

¹⁴Pilat hai hwnwi swng kha, “Tamoni bagwi? Bo tamo samung cha ya tang lang ba?”

Phiya ba bororok teibo sotonwi “Bono kruso buthar di!” hwnwi chirikhok lai kha.

¹⁵Pilat bororokno khá peng rwna muchungjago, aboni bagwi Barnabano bórokni bagwi phiyógwi rw kha. Tei sengkrakrokno chemuksa bai Jisuno swprak di hwnwi sa kha. Hakhe bono kruso butharna bagwi sengkrakrokno yapharwi rohor kha.

¹⁶Pilatni sengkrakrok Jisuno gobornorni noyungo tlang kha (abono Praetorium hwno). Bórok kubun bebak sengkrakrokno thansa khe ringhor bai kha. ¹⁷Bórok Jisuno rí kochual kan rwui rw lai kha, busu gwnang bedekni motok rabwi abono bokhorogo thup rwi rw lai kha. ¹⁸Hakhe bórok hai hwnwi chirikhokna cheng lai kha, “Judairokni bubagrano, lamsogo.” ¹⁹Bórok bini bokhorogo raidang bai bú lai máng tong kha tei bono khúktwi musu lai kha. Aboni ulo bórok yáskú sungwi bono bubagrano bórom rwma hai khe rwui tatal khe khulumwi phunuk lai kha. ²⁰Bórok bono yasek-khusek khe thwng laiwi pái khe, bórok a rí kochualno khugwi bini ríno haino hai kan rwui rw phi kha. Aboni ulo khe bórok bono noyungni tikhlaiwi kruso butharna bagwi tlang lai kha.

Jisu Kruso Kanta Bujakmani

²¹Aro Kurinini Simon hwnwi borok khoroksa auarni simi kamiyung koto ro himwi thángwi tongmani. Bo wng kha Aleksandar bai Ruphni bupha. Sengrakrok bono Jisuni krusno juraboli khe bal rw kha. ²²Jisuno bórok Golgotha hwnwi kwrwngsa-o tlang kha. (Golgotha hwnma wng kha “Bokhorok Chara.”) ²³Bórok bono aro mur bai dalokjak angur bwtwi hadi kha, phiyaba bo abono nwnagna soi li ya. ²⁴Sengkrakrok Jisuno kruso kanta bu lai kha. Hakhe bórok bini ríno patkarwi sabo bubono manthai klai abono nai laiwi bórok kiching bórok banta khe na lai kha.

²⁵Bórok phungni damchuku-o Jisuno kruso kanta bu kha. ²⁶Aro bini majrani marini bagwi, “JUDAIROKNI BUBAGRA” hwnwi swiwi rw lai kha. ²⁷Bórok majra gwnang borok khoroknwinobo Jisu bai baksa kruso kanta bu kha, khoroksano yagra tei khoroksano yaksi bwkhak. ²⁸⁷⁸

²⁹Abo twí himnairok Jisuno kók hamya sa lai kha. Bórok

⁷⁸15:28 Grikni baksa bijabo 28 bwtang sitokjak kha. “Hakhe Elembago sajak tongmani bebak kókrok nang phai kha, ‘bórok bono majra gwnangrok bai baksa khe ton kha.’”

bokhorok jangri-jangriui hai hwnwi sa lai kha, “Nwng noktharno swbai mano tei salthamni bisingo’-no abono tisau mano hwnwi sa-o.”³⁰Hakhe krusni ongkhorwi phaiwi sakno mwthang gra di!”

³¹Ochai okrarok tei kerong phwrwngnairokbo aro-o tongo. Bui khlai twino bórokbo Jisuno thesra kari lai sa kha. Bórok kiching bórok hai hwnwi sa lai kha, “Bo buino le mwthango phiya ba sakno khe mwthangwi man ya!³²Tumung bo sóino Masia hwn khe, Israilni bubagra hwn khe, bo tabukno krusni ongkhorwi phai thung. Hakhe abono chwng nuk khe, bono poito khlainai.” Jisuni samo kruso bujaknai majra gwnangrokbo bono kók hamya sa lai kha.

Jisu Thwimani

³³Diboro ha gwnangwi mwnagwi tháng kha. O mwnakma dam kwtham jora tong kha. ³⁴Dam kwtham phuru Jisu sotonwi chirigwi “Eloi, Eloi, lama sabakthani” hwnwi chirikhok kha, abo khe “O ani Kaitor, o ani Kaitor, tamo wngwi nwng ano saichung khibi lang?”¹⁹ hwnma se.

³⁵Aro bachau tongnai baksa bororok abono khnau hai hwnwi sa lai kha, “Khna di! Bo Eliano ringwi tong kha.”

³⁶Aroni bere borok khoroksa khachigwi wsponj nahar kha. Bo angur bwtwi siringjago abono chomsa kha tei abono raidango khe kha kha. Bo a wsponj gwnang raidangno Jisu nwng thung hwnwi hadi hor kha. A borok hai hwnwi sa kha, “Chwng tabuk naisingwi naigrana Elia phaiwi bono krusni ka da kari phai.”

³⁷Hakhe Jisu sotonwi chirikhogwi hama lai kha.

³⁸Jisu thwi phuru, Noktharni rí swngjak khaknwi khe kichigwi tháng kha. Abo buchukni simi chengwi yaphang jora kichigwi tháng kha. ³⁹Jisu thwi phuru wngmarokno krus bws kango bachau tongnai sengkrakrokni bokhorok abono nugwi hai hwnwi sa kha, “O borok sóino Kaitorni Sajla!”

¹⁹15:34 Lobjung 22:1 bwtangni najak kha.

⁴⁰Baksa bwrwirok krusni hakchalo bachau, naharwi tong lai-o. Bórokni bisingo Magdalinini Mariam, Salomi tei Jakob bai Josini buma Mariam. (Jakob wng kha bini sajla kusu.) ⁴¹O bwrwirok Jisu Galili-o tong phuru bini logi tongnairok tei bono naikolnairok. Bini logi-o Jerusalemo phainai kubun bwrwirokbo kwbangma aro tongo.

Jisuno Phobmani

⁴²O salno Tiyar sal hwnjago. (abo wng kha Sabat salni swkangni sal). Aphuru mwnak rwrwk wng kha. ⁴³Arimathiani Josep mungwi borok khoroksa bwkha torwi Pilatni aro thángwi Jisuni mangno sanwi kha. Josep kaunsil kuchukni khoroksa bórom khlaijaknai borok. Bórokni bisingo bo'-bo khoroksa Kaitorni ha phai thung hwnwi nainai.

⁴⁴Jisu thwi kha hwnwi khnau Pilat uanajak kha. Bo bini sengkrakrokni bokhorokno ringwi Jisu da thwi kha hwnwi swng kha. ⁴⁵Pilat aphuru sengkrak bokhorokni khúgo khna kheno, bo a mango tlangwi mano hwnwi Josepno sa kha.

⁴⁶Josep lilonni rí kisa paiwi tubu kha. Bo krusni mangno kariui a rí bai khe dulwi tei a mangno holongdabo khurjak mangkhorokhe tonwi kha. Aboni ulo bo holongdap kotorma goirok rwui duglam muthubwi rw kha. ⁴⁷Jisuno buro phob kha abono Magdalini Mariam tei Josini buma Mariam nuk kha.

Jisu Kwthwini Thangwi Bachamani Kóktma

16 ¹Sabat salni teini salo, Magdalinini Mariam, Salomi tei Jakobni buma Mariam Jisuni mango phulna hwnwi thok motom pai lai kha. ²Hati barsani puilani salo, phung aisirisiri sal pasadrobo a bwrwirok mangkhorok tháng lai kha. ³A bwrwirok bórok kiching bórok “Aro holongdap kotorma bai mangkhorni duglam kholobjak, sabo chwnngo holong norwi rwnai?” hwnwi sa lai kha.

⁴Aphuru bórok naharwi naiba holongdap norjak nuk kha.

A holongdap kotorma se, phiyaba abo duglamni norjak. ⁵A bwrwirok mangkhorob habwi kha tei aro rí kuphur chumjak sikla khoroksano nuk kha. Bo mangkhorni yagra bwkhak achukjak. Abono nugwi a bwrwirok kirijak lai kha.

⁶Phiyaba a borok hai hwnwi sa kha, “Ta kiri di. Norok kruso kanta buwi butharjaknai Nasaretni Jisuno naitugwi tongo. Bo kwthwini thangwi bacha kha! Bo oro kwrwi kha. Nai di, orono bo kwthwi phuru bórok bono tonmani.” ⁷Tabuk tháng si di tei bini sagrirokno saui di. Tei Pitornobo saui di. Bórokno hai hwnwi sa di, ‘Jisu Galili-o thángnai tei bo aro norok sógwi ya sini swkangno sógwinai. Bo sama haino norok bono aro nugwi anw.”

⁸A bwrwirok belai kirima hapjagwi bwkha udru-mudru wngjak kha. Bórok mangkhor yakarwi khárwi phai lai kha. Tei bórok kirijakma bai tamo wng kha mungsa phano sa lai li ya. ²⁰

Sagrirokni Bere Baksa Jisuno Nukmani.

⁹Hati barsani puilani salni aisirisiri-o Jisu kwthwini thangwi bacha kha. Bo puila Magdalinini Mariam bai nukjak phai kha. Swkango bini bisingni maksni mwtaí hamyano Jisu rwxhlai kha. ¹⁰Jisuno Mariam nukmani ulo, bo thángwi bini sagrirokno saui kha. Bórok aphuru khá báíwi kap laijak. ¹¹Phiyaba Mariam bórokno Jisu kwthang se hwnwi saui kha. Bo Jisuno nuk kha hwnwibo sa kha, hai phano bórok bono poito khilai li ya.

¹²Aboni ulo, sagri khoroknwi kami bwkhak himwi thángwi tong phuru Jisu bórok bai nukjak kha. Phiyaba Jisu butharjakna swkang tongmani hai sol li ya. ¹³O sagrirok kiphilwi thángwi tei kubun sagrirokno o wngmarokno saui kha. Haino hai, a sagrirokbo bórokno poito khilai li ya.

²⁰**16:8** O bijap Grikni baksa kwcham bijaprogo oro'-no pái-o. Ulni baksa bijaprokbo omo hai bara kheno pái-o: “Phiyaba bórok daktino Pitor bai bini logi tongnairokno bebakno saui rohor bai kha. Molbrúm-brúmni mwthangjak phlaina bagwi swlajak phlai ya kwthar kothoma kaham bai Jisu baithangno bórokno salkabaini simi salthangbai bwkhak rohor kha.”

Jisu Bini Sagrirok Bai Kók Samani

¹⁴Aboni ulo, sagri khorokchisarok chá lai tong phuru Jisu bórok bai nukjak phai kha. Bo bórokni poito belai kisa wngma bagwi bórokno khorai kha. Tamoni hwnba bórok buj tháisa wngma bai Jisu kwthwini thangwi bacha kha hwnwi sa phainai bororokno poito khilai li ya.

¹⁵Bo bórokno hai hwnwi sa kha, “Tháng di, hayung gwnangwi bebak bororokno kothoma kahamno saui di. ¹⁶Poito khilaiwi baptisma wngnai borok bo se mwthangjaknai. Phiyaba poito khilai ya borok khe bo majra berjaknai. ¹⁷Tei poito khlainairok omo t́wi soidomni samung khilaiwi man anw: Ani mungwi bórok bororokni bisingni mwtaí hamya rwkhlainai. Bórok uaisa phano swrwngjak ya kórok bai kók sa anw. ¹⁸Tumung bórok chibukrokno rom phano eba mungsa swk bis nwnng phano hamya wng glak. Bórok bórokni yakno sak hamya bororokni saka-o beranai, tei bórok hamwi tháingnai.”

Jisu Chuknoha-o Kiphilma

¹⁹Subrai Jisu o kórokno bini sagrirokno sa bai kheno, Chuknoha-o tisau tlangjak kha. Aro-o, Jisu Kaitorni yagra bwkhak achugwi kha. ²⁰Sagrirok hayung gwnangwi bororokni thani tháingwi kothoma kahamno saui kha, tei Subrai bórokno chuba kha. Bórokno soidomni samung khlainani phan rwui bórok pírmáni kothoma kahamno kubui hwnwi Subrai phunuk kha.

